

## **ማርቆስ ጸፊዳ ኑ ጎዳ ዩሱስ ኪርስቶስ ሚሺራቾ ቃላ ጊደ ቆፋ**

ማርቆስ ሚሺራቾ ቃላይ፡ «ሃይሲ ጸሳ ና ዩሱስ ኪርስቶስ ሚሺራቾ ቃላስ ኮይሮ» ጉሳን ዶሜስ። ሃይሳ ሃ ሚሺራቾ ቃላዛ ጊደን ዩሱሲ ኦሳንቻኔ ኢዚ ጎዳቴላራ ዲዛዴ ጊዲ ሸቂዴስ። ጎዳቴሊካ ኢዛ ተሚርቴን፡ ዳይዳንሳታ ቦላ ዲዛ ዎልቃኒኔ ኢዚ ኣሳ ናጋራ ኣቶ ጊዳይሳን ኤሬቲዴስ። ዩሱሲ፡ «ናጋራ ኣይሌቴላፊ ኣሳ ኬሲ ኤካናሰ ታ ሸምፖ ኣሳ ጊሻሰ ኣላ ኢማናሰ ዩዳ ኣሳ ናይ ታና» ጊዲ ባርካ ዮቲዴስ።

ማርቆስ ዩሱሳ ታሪኬ ሺሺዳይ ቆንጩኒኔ ዎልቃይ ኩሚዳ ኦጌራ ጊዲሺን ኢዚ ተሺ ሂስቲ ጸሊዳይ ዩሱሳ ቃላኔ ኢዛ ተሚርቴዛ ጊደንታ ኢዚ ኦሊዳ ጊታ ማለታ ኦሶታ። ኢዚ ጸማቂዛ ዮሃኒሳ ጊሻሰ፡ ዩሱሳ ጸንቃታ ጊሻሲኔ ኢዚ ኤኪዳ ሜቶዛ ጊሻሰ ቃንላራ ዮቲዳፔ ጉዬ ዩሱሲ ታማርሲዳ ተሚርቴዛ ጊሻሲኔ ኢዚ ሃርጋንቻታ ፓሊዳይሳ ቢርሺ ዮቲስ። ዩሱሳ ካለዛይቲ ጉዬፔ ዩሱሳ ሎኤሊ ኤሪ ኤሪ ቢዳ ማላ ዩሱሳራ ኤቄቲዛይቲ ቃሴ ዩሱሳ ካሴፔ ኣሊ ኢጺ ኢጺ ቢዳ። ማጻፋሰ ወርሴላ ሸምፖቲ ዩሱሲ ቢታ ቦላ ዴኢዳ ወርሴላ ላይላን ወርሴላ ሳሚንታን ፖሌቲዳ ኦሶታ፡ ሃራፔካ ኢዛ ካቄቴላ ጊሻሲኔ ኢዛ ዴንላ ጊሻሰ ዮቲቴስ።

ማርቆስ ሚሺራቾ ቃላስ ወርሴላን ዲዛ ናምኡ ኪፊሌቲ ኢሲ ኢሲ ማጻፋታን ጸላ ዴቴስ።

### **ሃ ማጻፋይ ኦይኪዳ ኩሚላ ቆፋ**

ሚሺራቾ ቃላስ ኮይሮ ዶሜስ 1:1-13

ዩሱሲ ባ ኦሶ ኮይሮ ጋለላን ዶሚዴስ 1:14—9:50

ዩሩሳላሚን ዩሱሳ ኦሶ 10:1-52

ዩሩሳላሚኒኔ ሄ ሄራን ወርሴላ ሳሚንታን ዩሱሳ ጋኪዳ ሜቶ  
11:1—15:47

ሃይቆፔ ጎዳ ዴንስ 16:1-8

ሃይቆፔ ዴንዲዳ ጎዳ ቆንጩሊኔ ፑዴ ሳሎ ቡስ 16:9-20

ጸማቂዛ የሃኒሳ ማርካቴል

(ማቶ 3:1-12፤ ሉቃ 3:1-18፤ ዮሃ 1:19-28)

1 ጸላ ና ዬሱስ ከርስቶስ ኮይሮ ሚሺራችይ ሃይሳ፤ \*

2 ናቤ ኢሳያስ ባጋራ፤

«ሄኮ ኔስ ኦጌ ሎኤላናስ

ታ ከታናዳ

ኔፔ ሲንሳራ ዬዳና።

3 ሳዳስ ኦጌ ገግሲቴ፤

ኢዚ ባና ኦጌ ሱሪሲዲ ኦሊቴ)

ጊሼ ባዞ ቢታን

ዋሲዛ ጊሪስ»

ጌቴቴ ጸፊቴዳስ።

4 ሄሳሐካ ጸማቂዛ የሃኒሲ አሳ ጸማቂሼ፤ «ኢንቴ ናጋራፔ ሲሚዲ ጸማቂቴቴ፤ ጸሲ ኢንቴ ናጋራ አቶ ጋና» ጌ አዋጂሼ ባዞራ ኬዚ ዋጂዳስ።

5 ዩሁዳ ዳሬይ ኩሜል ዬሩሳላሜ አሳይ ዉሪ የሃኒሳኮ ቢ ቢዲ ባ ናጋራ ናጋራ ፓጺ ፓጺ ዮርዳኖሴ ሻፋን የሃኒሳ ኩሼን ጸማቂቴዳስ።

6 ሄ ዋዴ የሃኒሲ ማይኢዛይ ጋሜላ ኢስኬፊ ኦሴቴዳ ማይኦ፤ ቃሴ ባ ዴሳን ዳፎ ጊዴስ፤ ኢዚ ሚዛ ቁማይ ቦሌኔ ዴጌራ ኤሳ።

7 ኢዚ፤ «ታኒ ሆካዳ ኢዛ ጫማ ቃሾ ቢርሻናስ ቤሶንታዴይ፤ ታፔ አጂዛዴይ ታፔ ጉዬራ ያና።

8 ታኒ ኢንቴና ሃላን ጸማቃይስ፤ ኢዚ ጊዲኮ ኢንቴና ጸሎ አያናን ጸማቃና» ጌ ሳባኪዳስ።

ዬሱሳ ጸማቂቴሲኔ ፓጩቴል

9 ሄ ዋዴ ዬሱሲ ጋሊላ ጊዶን ዲዛ ናዚሬቴ ጌቴቴዛ ካታማይፔ ዮርዳኖሴ ሻፋ ዪዲ የሃኒሳ ኩሼን ጸማቂቴዳስ።

10 ዬሱሲ ጸማቂቴዲ ሃላፊ ኬዚዳ ማላ ሳሎይ ዶዬቴን ጸሎ አያናይ ኢዛ ቦላ ሃራጾ ሚሳቴዲ ዋጂሺን ቤዪዳስ።

11 ቃሴካ፤ «ታ ዶሲዛ ናይ ኔና፤ ኔናን ታ ኡፋዬታይስ» ጊዛ ቃላ ጊሪሲ ፑዴ ሳሎፔ ሴቴቴዳስ።

12 ሄራካ ጸሎ አያናይ ኢዛ ዱጌ ባዞ ካሌሊ ኤፊዳስ።

\* 1:1 ኢሲ ኢሲ ገሻ ማጻፋታን ጸላ ና ጊዛ ቃላዚ ጸፊቴቤና። 1:2 ሚል 3:1

1:3 ኢሳ 40:3 1:6 2ካዋ 1:8 1:11 ሜዴ 22:2፤ ማዛ 2:7፤ ኢሳ 42:1፤

ማቶ 3:17፤ 12:18፤ ማር 9:7፤ ሉቃ 3:22

13 ሄን ባዞንካ ኦይዱ ታሙ፤ ጋላስ ጋካናስ ጸላኤራ ፓጩቲሼ ጋምኢዴስ፤ ዶኦታራ ኢሲፌ ዴኢዴስ፤ ኪታንቻቲካ ኢዛ ማዲዳ።

**ዩሱሳ ካላና ማላ ኦይዱ አሳታ ጴይጌቱል**

14-15 ዮሃንሲ ቃሾ ኬል ጌሊዳፔ ጉዬ ዩሱሲ ጸሳ ሚሺራች ቃላ ሳባኪሼ ጋሊላ ቢዲ፡ «ዋዴይ ጋኪዴስ፤ ጸሳ ካዋቱል ማቲዴስ፤ ናጋራፔ ሲሚቱ፤ ሚሺራች ቃላን አማኒቱ» ጌዲ ሳባኪዴስ።

16 ዩሱሲ ጋሊላ አባ አቻራ አቋን ሲሞኒኔ ኢዛ አሻ ኢንዲራሲ ሞሌ ኦይኪዛይታ ጌዲዳ ገሻስ ኢስቲ ሞሌ ኦይኪዛ ጌቱ አባን ዩጊሺን ቤዩዴስ።

17 ዩሱሲ ኢስታ፡ «ሃ ዩቱ! ታና ካሊቱ፤ ኢንቱ ሞሌ ኦይኪ ሺሺዛ ማላ ታ ኢንቴና አስ ኦይኪዛይታ ኦላና» ጌዴስ።

18 ኢስቲ ሄራካ ሞሌ ጌቱዛ ዩጊ አጊዲ ዩሱሳ ካሊዳ።

19 ጉል ጌዴ ሲንፌ አቋዲ ዛብዶሳ ና ያቆቤይኔ ኢዛ አሻ ዮሃንሲ ዋጎሎን ኡቲዲ ሞሌ ጌቱ ጊግሲሺን ቤኢዲ ሄራካ ኢስታ ጴይጌዴስ።

20 ኢስቲካ ባ አዋ ዛብዶሳኔ ኢዛስ ቃጻሬቲ ኦሊዛ አሳታራ ኢሲፌ ዋጎሎዛ ጌዶን አጊዲ ዩሱሳ ካሊ ቢዳ።

**ዩሱሲ ፓሊዳ ቱና ኢያናይ ኢዛ ቦላ ዲዛዴ**

21 ሄፔካ ቂፊርናሆሜ ቢዳ። ሄራካ ዩሱሲ አይሁዳታ ሳምባታ ጋላስ አይሁዳታ ዋሳ ኬል† ጌሊዲ ታማርሶ ኦይኪዴስ።

22 ጳፌታ ማላ ጌዶንታ ጎዳቱላራ ዲዛ አሳ ማላ ኢዚ ታማርሲን አሳይ ዉሪ ኢዛ ቲሚርቱዛን ማላሌቲዴስ።

23 ሄ ዋዴ አይሁዳታ ዋሳ ኬልን ቱና ኢያናይ ኢዛ ቦላ ዲዛ ኢሳዴይ፡

24 «ናዚሬቱ ዩሱሳ ኔ ኦፔ አይ ኮያይ? ኦና ቆይሳና ያዲ? ኔ ኦናኮ ታ ኔና ኤራይስ፤ ኔኒ ጸሳ ጌሻዛ» ጌዲ ዋሲዴስ።

25 ዩሱሲካ ቱና ኢያናዛ፡ «ጮኡ ጋዳ ኢዛፔ ኬዛ!» ጌ ሃንቂዴስ።

26 ቱና ኢያናይ አዴዛ ጌንዴሪሲዲ ኢዚ ቃኬቲሺን ኢዛፔ ዋሲሼ ኬዚዴስ።

27 ዴሬይ ዉሪ፡ «አሶ ሃይሲ አዛ ፓላ? ሃይሲ ጎዳቱላራ ዲዛ ኦራሳ ቲሚርቱ፤ ቱና ኢያናታካ አዛዜስ፤ ኢስቲካ ኢዛስ አዛዜቱስ» ጌ ማላሌቲሼ አሳይ ባ ጌዶን ኢሶይ ኢሳ ኦይሼች ኦይኪዴስ።

† 1:21 አይሁዳታ ዋሳ ኬል ጌቱቲዛይሲ አማራቃ ቃላን «ሚኩራቤ» ጌቱቲስ።

28 ሄራካ ኢዛ ኦሶ ዋሬይ ጋሊላ ዩሾን ዲዛ ዳሬ ኡባን ሲዬቲዳስ።

### ዩሱሲ ዳር ሃርጋንቻታ ፓሊዳስ

29 እይሁዳታ ዋሳ ኬላፌ ኬዚዳ ማላ ያቆቤራኔ ዮሃንሳራ ኢሲፌ ጌዴ ሲሞናሶኔ እንዲራሳሶ ጌሊዳ።

30 ሄ ጌሊዳ ማላ ሲሞና ቦሎቴያ ሚሻ ሃርጌ ሳኬታዳ ኢቺዳይሳ ኢዛስ ዮቲዳ።

31 ሄሳ ጊሻስ ዩሱሲ ኢዚኮ ሸቂዲ ኢዚ ኩሼ ኦይኪ ዴንሊዳስ። ሚሻይ ኣጊን ኢዛ ዴንዳዳ ኢስታ ሞካዲስ።

32 ኣርሼይ ወሊዳፔ ጉዬ ጋዴይ ቋሚሽን ኣሳይ ሃርጋንቻታኔ ዳይዳንሉ ኦይኪዳ ኣሳ ወርሲ ዩሱሳኮ ኤኪ ዪዳስ።

33 ሄ ካታማዪን ዲዛ ኣሳይ ወሪ ኬላ ካሬን ሸቂዳስ።

34 ኢዚካ ዲማ ዲማ ሃርጌን ሳኬቲዳይታ ዳርታ ፓሊዳስ፤ ዳር ዳይዳንሳታካ ኬሲዳስ፤ ጊዶ ኣቲን ዳይዳንሳቲ ዩሱሲ ኦናኮ ኤሪዛ ጊሻስ ኢስቲ ሃሳያና ማላ ዩሱሲ ኮዪቤና።

### ዩሱሲ ጋሊላን ታማርሲዳ ሚሺራች ቃላ

35 ባዘይ ዘኣንታ ዩሱሲ ማላዶ ዋንታራ ዴንዲዲ ኣሲ ባይንዳሶ ቢዲ ሄን ዋሳ ኦይኪዳስ።

36 ሲሞኒኔ ኢዛራ ዲዛይቲ ዩሱሳ ኮያና ኬዚ ቢዳ።

37 ኢስቲ ኢዛ ዴሚዲ፡ «ኣሲ ወሪ ኔና ኮሻን ዳስ» ጊዳ።

38 ዩሱሲካ፡ «ታ ዪዳይ ታማርሳናስ ጊዲዳ ጊሻስ ሚሺራች ቃላ ዮታናስ ማታን ዲዛ ጉታታ ኣኔ ቦስ» ጊዳስ።

39 ሄሳ ጊሻስ ኣይሁዳታ ዋሳ ኬላን ጌሊ ጌሊ ሳባኪሼኔ ዳይዳንሉ ኬሲሼ ጋሊላ ካታማ ኩሜላን ዩዪዳስ።

### ዩሱሲ ኢንቺራቻ ሃርጊዛዴ ፓሊዳስ

40 ኢሲ ኢንቺራቻ ሃርጊዛዴይ ዩሱሳኮ ሸቂዲኔ ኢዛ ሲንላን ጉልባቲዲ፡ «ኔ ሼኔ ጊዲኮ ኔ ታና ፓላና ዳንዳያሳ» ጊ ዋሲዳስ።

41 ዩሱሲካ ኣዴዛስ ሚሼቲዲ ባ ኩሼ ዬዲ ኢዛ ቦቺዲ፡ «ኔ ፓጻና ማላ ታ ኮያይስ፤ ፓጻ!» ጊዳስ።

42 ሄራካ ኣዴዛ ኢንቺራቻ ሃርጌይ ኣጊን ኣዴዚ ፓጺዳስ።

43-44 ዩሱሲካ ኣዴዛስ፡ «ኦናስካ ሃይሳ ኔ ዮቶንታ ማላ ናጌታ፤ ጊዶ ኣቲን ባዳ ቁሴስ ኔና ቤሳ። ዴሬዛስ ማርካ ጊዳና ማላ ኔ ፓጺዳይሳስ ሙሴይ ኣዛዚዳ ያርሾ ሸሻ» ጊዲ ኬሄ ሚንሉ ዮቲዳስ።

45 ጊዶ ኣቲን ኣዴዚ ኬዚ ቢዲ ባ ቢዳ ኡባሶን ዋሬ ዳርሲ ቋርጨዳስ። ሄሳ ጋሶን ዩሱሲ ኣይ ካታማንካ ቆንጨራ

ጌላናስ ዳንዳይቤና። ሄሳፌ ዳንዳይሳን ካታማፔ ካሬራ እሲ ባይንዳሶን ዱስ ኦይኪዳስ። አሳይ ጌዲኮ ዱማ ዱማሶፔካ ኢዛኮ ዪዳስ።

## 2

ዬሱሲ ቶሆ ሲላ አዳዛ ፓሊዳስ

(ማቶ 9:1-8፤ ሉቃ 5:17-26)

<sup>1</sup> ጉላ ጋላሳፌ ጉዬ፥ «ዬሱሲ ቂፊርናሆሜ ሲሚዲ ሶን ዳስ» ጌዛ ዋሬ አሳይ ሲዪዳስ።

<sup>2</sup> ሄሳ ገሻስ ከላራ፥ ካሬራ ኡቴዛሶይ ጳያና ጋካናስ ዳሮ ዳሬይ ሸቂዳስ። ኢዚካ ጸሳ ቃላ አሳስ ሳባኪዳስ።

<sup>3</sup> ኦይዱ አስ ዳይቲ ቶሆይ ሲሊዳ ኢሲ አስ ቶኪዲ ኢዛኮ ኤሂዳ።

<sup>4</sup> አሳ ዳሮቴላፌ ዳንዳይሳን ዬሱሲ ዲዛሶ ጋላናስ ዳንዳዮንታ ገሻስ ዬሱሲ ዲዛ ገናራ ካራ ቃሪዲ ሃርጋንቻዛ ኢዚ ኢቺዳ ሃላራ \* ዬሱሳ ሲንሐ ዲጌ ዋሊዳ።

<sup>5</sup> ዬሱሲ አሳታ አማኖ ቤኢዲ ቶሆይ ሲሊዳ አዳዛ፥ «ታ ናዘ! ኔ ናጋራይ አቶ ጌቴቲዳስ» ጌዳስ።

<sup>6-7</sup> ሄን ጋዳን ኡቲዳ ኢሲ ኢሲ ሙሴ ዋጋ ጸፊቲ ባ ዋዚናራ ሃይሲ አዳዚ ዋስቲ ሃይሳላ ጌዜ? «ጸሳ ቦላ ጫሻ ቃላ ሃሳዬስ። ኢሲ ጸሳፌ አቲን ናጋራ ማራና ዳንዳይዛይ ኦኔ?» ጌዲ ቆፒዳ።

<sup>8</sup> ዬሱሲ ሄራካ ኢስቲ ባ ዋዚናን ቆፒዳይሳ ባ አያናን ኤሪዲ፥ «አንቴ ዋስቲ ሃይሳላ ቆፒቲ?»

<sup>9</sup> ቶሆይ ሲሊዳ አዳዛ፥ «ኔ ናጋራይ አቶ ጌቴቲዳስ» ጉሳፌኔ «ዳንዳዳ ኔ ሃላ ቶካዳ ባ» ጉሳፌ አዋይሲ ማቲዜ?

<sup>10</sup> ጌዶ አቲን አሳ ናስ ቢታ ቦላን ናጋራ ማራና ጎዳቴሊ ዲዛይሳ ኢንቴ ኤራና ማላ» ጌዲ ቶሆ ሲላ አዳዛ።

<sup>11</sup> «ዳንዳዳ ኔ ቶኪታ ዪዳ ሃላ ቶካዳ ኔሶ ባ» ጌዳስ።

<sup>12</sup> ኢዚካ ዳንዳዲ አሳይ ወሪ ቤዪሺን ሃላ ቶኪዲ ቢዳስ። ሄን ጋዳን ዲዛ አሳይ ወሪ ሃኖዛን ማላሌቲዲ፥ «ካሴ ሃይሳ ማላይ ሃኒን ቤዪቤኮ» ጌዲ ጸስ ጋላቲዳስ።

ሌዌ ጳይጌቴሐ

(ማቶ 9:9-13፤ ሉቃ 5:27-32)

<sup>13</sup> ቃሴካ ዬሱሲ ጋሊላ አባ ላንቄ ቢዳስ። ዳሮ ዳሬይ ኢዛኮ ዪን ኢዚካ ዪዳ አሳ ታማርሲዳስ።

\* 2:4 ሃላራ፥ ሃላራ ጌዛይሳ ኢሲ ኢሲ ባጋ ጋዋሶ ቃላን ዛጳራ ጌቴስ።

14 ኢዚ ኦጌራ ኣጵቢ ቢሽን ኢልፊዮሳ ና ሌዌይ ቃራጸ ሺሺዛሶን ኡቲዳይሳ ቤኢዲ፡ «ሃ ያ ታና ካላ» ጊደሰ። ኢዚካ ዴንዲዲ ዬሱሳ ካሊዴሰ።

15 ሄሳፌ ጉዬ ሌዌ ሶን ካላ ማዳን ኡቲ ዲሺን ቃራጸ ሺሺዛ ዳሮ ኣሳቲኔ ናጋራንቻቲ ኢዛራ ካሊ ዬዳ ጊሻሰ ኢሰቲ ዬሱሳራኔ ኢዛ ካሊዛይታራ ኢሲፌ ማዳን ኡቲዳ።

16 ፋርሳዌታ ባጋፌ ጊዲዳ ሙሴ ዋጋ ታማርሲዛይቲ ዬሱሲ ናጋራንቻታራኔ ቃራጸ ሺሺዛይታራ ሚሺን ቤኢዲ ኢዛ ካሊዛይታ፡ «ቃራጸ ቃንጺሲዛይታራኔ ናጋራንቻታራ ኣዛሰ ሚዜ?» ጊዲ ኦይቺዳ።

17 ዬሱሲካ ኢሰቲ ጊዛይሳ ሲዬዲ፡ «ኣኪሜይ ሃርጋንቻታሰ ኮሺሰ ኣቲን ሃርጎንታይታሰ ጊዴና። ታኒካ ናጋራንቻታ ጴይጋናሰ ያዲሰ ኣቲን ጸሎታ ጴይጋናሰ ያበኬ» ጊዴሰ።

ጸማ ጊሻሰ ሺቂዳ ኦይሾ

(ማቶ 9:14-17፤ ሉቃ 5:33-39)

18 ዮሃኒሳ ካሊዛይቲኔ ፋርሳዌቲ ጸማ ጸሜቲሰ። ኢሲ ኢሲ ኣሳቲ ዬሱሳኮ ዬዲ፡ «ዮሃኒሳ ካሊዛይቲኔ ፋርሳዌታ ካሊዛይቲ ጸሜቲሰ ሺን ኔና ካሊዛይቲ ኣዛሰ ጸሜቲ?» ጊ ኦይቺዳ።

19 ዬሱሲካ ኢሰታሰ፡ «ሚሺራይ ኢሰታራ ዲሺን ሚሺራ ላጌቲ ጸሚ ኤሬዝ? ሚሺራይ ኢሰታራ ዲሺን ጸሚ ኤሬቲና።

20 ሚሺራይ ኢሰታፌ ኤኬታና ዋዴይ ያና። ሄ ዋዴ ኢሰቲ ጸማና።

21 «ጋልኣ ማይኦ ቦላ ኦራላ ዋሶ ዋሊ ሲኪዛዴይ ኦኒካ ዴና፤ ሄሳሶ ኦሊኮ ኦራላዚ ጋልኣ ዳኪ ዳኪ ዩጌሰ፤ ዳኬላይካ ካሴፔ ጌዴ ኣጵ ኢቲሰ።

22 ሄሳሶካ ኦራላ ዋይኔ ጫጃ ጋልኣ ሉካሞን ዋሊዛዴይ ዴና። ዋሊዛ ጊዲኮ ዋይኔ ጫጃዚ ጋልኣ ሉካሞዛ ቆሴሰ፤ ዋይኔ ጫጃዚኔ ሉካሞዚ ናሞኣይ ሞሬቲቲሰ። ሄሳ ጊሻሰ ኦራላ ዋይኔ ጫጃይ ዳናሰ ቤሲዛይ ኦራላ ሉካሞና» ጊዴሰ።

ሳሞባታ ጊሻሰ ሺቂዳ ኦይሾ

(ማቶ 12:1-8፤ ሉቃ 6:1-5)

23 ዬሱሲ ኣይሁዳታ ሳሞባታ ጋላሰ ጊሰቲ ቲያ ጊዶራ ኣጵሺን ኢዛ ካሊዛይቲ ኢዛራ ኢሲፌ ቢሺ ቲያ ጵጵ ኦይኪዳ።

24 ፋርሳዊቱ፡ «ኔና ካሊዛይቲ ሳምባታ ጋላስ ዲጌቲዳ ሚሽ አዛስ ኦሊዞ?» ጌዲ ዬሱሳ ኦይቺዳ።

25 ኢዚካ ኢስታስ፡ «ዳዊቲ ጋፊዲ ሚዛ ሚሽ ኮዪዳ ዎዴ ኢዛሪ ኢሲፌ ዲዛይታራ ኢዚ ኦሊዳይሳ ናባቢቤኬ?»

26 ኣቢያታሬይ ቄሴታ ሃላቃቴላን ዲሺን ኢዚ ጸሳ ኬፍ ጌሊዲ ቄሴቲ ጸላላ ማና ቤሲዛ ዲማ ካፋ ባስ ሚዲኔ ባናራ ዲዛይታስ ኢሚዴስ» ጌዴስ።

27 ቃሴካ ዬሱሲ ኢስታስ፡ «ሳምባታይ ኣሳስ ሜዴቲዴስ ኣቲን ኣሲ ሳምባታስ ሜዴቲቤና።

28 ሄሳ ጊሻስ ታ ኣሳ ናይ ሳምባታ ጎዳ» ጌዴስ።

### 3

ኩሼ ሲሊዳ ኣዴዛ ፓጻቴል

(ማቶ 12:9-14፤ ሉቃ 6:6-11)

1 ሃራ ጋላስ ዬሱሲ ኣይሁዳ ዎሳ ኬፍ ጌሊዴስ። ሄንካ ኩሼይ ሲሊዳዴይ ዴስ።

2 ዬሱሳ ሞታናስ ጋሶ ኮይዛ ኣሳቲ ኢዚ ኣይሁዳታ ሳምባታ ጋላስ ፓፋናኮን ጌዲ ፓሊሺን ቤያና ኮዪዳ።

3 ኢዚካ ኩሼይ ሲሊዳ ኣዴዛ፡ «ሄን ሺቂ ኡቲዳ ኣሳ ሲንላን ዴንዳ ኤቃ» ጌዴስ።

4 ሄሳፌ ጉዬ ዬሱሲ ኣሳ፡ «ሳምባታ ጋላስ ቤሲዛይ ሎኦ ኦሶዬ? ኢታ ኦሶ? ኣሳ ሸምፖ ኣሾዬ? ዎይኮ ሸምፖ ዎጽ?» ጌዲ ኦይቺዴስ። ኢስቲካ ጮኡ ጌዳ።

5 ኢስታ ዎዚና ሹቻቴላን ሚሼቲዲ ኢዛ ጌዶሊዲ ዩዪ ኣጲ ኤቂዳ ኣሳ ሃንቆራ ጴሊዲ ኣዴዛ፡ «ኔ ኩሼዛ ፒዲሳ!» ጌዴስ። ኣዴዚካ ባ ኩሼ ፒዲሲን ኩሼዚ ሙሊራ ፓጲዴስ።

6 ፋርሳዊቲ ኬዚ ቢዲ ኢዛ ዎስቲ ጳይሳናኮ ሄርዶሳ ባጋ ጌዲዳ ኣሳታራ ዞሬቲዳ።

ኣባ ለንቄን ዳር ኣሳ ሺቆ

7 ዬሱሲ ባና ካሊዛይታራ ኣባኮ ቢዴስ። ጋሊላፔኔ ዩሁዳፔ ዩዳ ዳር ዴሬይ ኢዛ ካሊዴስ።

8 ኢዚ ኦሊዛይሳ ሲዪዲ ኣሳይ ዩሁዳፔ፡ ዩሩሳላሚፔ፡ ኤዶሚፔ፡ ዮርዳኖሴ ፒንላን ዲዛ ዴሬታፔ ቃሴ ጲርሴፔኔ ሲዶና ሄራፔ ኢዛኮ ዩዴስ።

9 አሳይ ዳዕዳ ገሻስ ኢዛ ኡንኤሶንታ ማላ ጉላ ዋጎሎ ኢስቲ ገጊሳና ማላ ባና ካሊዛይታ ኣዛዚደሰ።

10 ኢዚ ዳር ሃርጋንቻታ ፓሊዳ ገሻስ ሳኮይ ዋዩሲዛይቲ ወሪ ኢዛ ባ ኩሼራ ቦቻናስ ዳፊቲዳ።

11 ቱና ኣያናቲካ ዬሱሳ በኢዳ ማላ ኢዛ ሲንላን ኩንዲዲ፥ «ኔኒ ጸሳ ና» ገዲ ዋሲዳ።

12 ገዶ ኣቲን ኢዚ ኦናኮ ቱና ኣያናቲ ቆንጨሶንታ ማላ ኬሂፔ ሃንቂደሰ።

**ዬሱሳ ካሊዛ ታማኔ ናምኣታ ዶሬቴሉ**

(ማቶ 10:1-4፤ ሉቃ 6:12-16)

13 ዬሱሲ ፑዴ ዙማ ቦላ ኬዚዲ ባ ኮይዛይታ ባኮ ያና ማላ ዴይጊደሰ፤ ኢስቲካ ኢዛኮ ዪዳ።

14 ኢዛራ ኢሲፌ ገዳና ማላኔ ሳባካናስ ዬዳና ማላ ታማኔ ናምኣታ፥ «ሃዋሬታ» ገ ሱንሊደሰ።

15 ኣሳፔ ዳይዳንሳታ ኬሳና ማላ ኢስታስ ጎዳቴሉ ኢሚደሰ።

16 ኢዚ ሱንሊዳ ታማኔ ናምኣታ ሱንሊ ሃይሳፌ ካሊዛይሳ፤ ጴጽሮሳ ጌቴቲዳ ሲሞና፥

17 ቢኦሪኔጌሴ ዋይኮ ዳዳ ናይታ ጌቴቲዳ ዛብዶሳ ናይታ ያቆቤኔ ዮሃኒሳ፥

18 ኢንዲራሳ፥ ፒሊጶሳ፥ ባርቴሌሞሳ፥ ማቶሳ፥ ቶማሳ፥ ኢልፊዮሳ ና ያቆቤ፥ ታዶሳ፥ ባ ባጋስ ሚሹቲዛ ሲሞና፥

19 ዬሱሳ ኣሉ ኢሚዳ ኣስቆሮንቶ ዩሁዳ።

**ዬሱሳኔ ቢኤሊዜቡላ**

(ማቶ 12:22-32፤ ሉቃ 11:14-23፤ 12:10)

20 ሄሳፌ ጉዬ ዬሱሲ ኢሲ ሶ ጌሊደሰ። ኢዚኔ ኢዛ ካሊዛይቲ ካሉ ማና ዋዴይ ኢስታስ ጳያና ጋካናስ ዴሬይ ቃሴካ ዳሪ ሺቂደሰ።

21 ኢዛ ሃናታ ሲዪዳ ኢዛ ዳቦቲ፥ «ጎዮንታ ኣጌና» ገዲ ባናራ ኤኪ ባናስ ኢዚ ዲዛሶ ጋኪዳ።

22 ዬሩሳላሜፔ ዪዳ ጸፊቲካ፥ «ቢኤሊዜቡላ ጌቴቲዛ ዳይዳንሳታ ሃላቃይ ኢዛ ቦላ ደሰ። ኢዚ ዳይዳንሳታ ኬሲዛይ ዳይዳንሳታ ሃላቃ ዋልቃንኮ!» ገዳ።

23 ኢዚካ ኢስታ ዴይጊዲ ሌሚሶራ፥ «ጸላኤይ ኣሳፔ ጸላኤ ዋስቲ ኬሳኔ?

24 ባ ገዶን ሻኮይ ዲዛ ካዎቴሉ ሚናናስ ዳንዳዬና።

25 ኢሲ ኬላ ኣሲካ ባ ገዶን ሻኬቲኮ ኤቃናስ ዳንዳዬና።

26 ሄሳሱካ ጸላኤይ ባ ጋርሳን ኢሶይ ኢሳራ ሻኬቲኮኔ ኢጾቲኮ ሚኒ ኤቃናሰ ዳንዳዬና። ሄሲካ ኢዛሰ ወርሴል ገዳና።

27 «ሄሳ ጋሶን ኢሳዳይ ኮይሮቲዲ ዋልቃማ ኣስ ቃቸንታ ዲሼ ዋልቃማዛ ሶ ጌላናሲኔ ኢዛ ሚሼ ቦንቃናሰ ዳንዳዬና፤ ኢዛ ኣቆ ቦንቃናሰ ዳንዳዬቲዛይ ዋልቃማዛ ቃቸኮ ጸላላ።

28 «ታ ኢንቴስ ቱሙ ጋይሰ፤ ኣሳ ናይታሰ ናጋራይኔ ጫሺ ወሪ ማሬታና።

29 ገደ ኣቲን ጸሎ ኣያና ቦላ ጫሻ ቃላ ሃሳይዛ ኣሳ ኡባሰ ሜርናሰ ናጋራ ኣጮ ገዳና ኣቲን ማሬቲና» ገደሰ።

30 ሄሳ ኢዚ ገዳይ ኢሰቲ ኢዛ፥ «ኔ ቦላ ቱና ኣያናይ ዳሰ» ገደ ገሻሳ።

ዩሱሳ ኣዬዮኔ ኢዛ ኢሻታ

(ማቶ 12:46-50፤ ሉቃ 8:19-21)

31 ሄሳፌ ጉዬ ኢዛ ኣዬያኔ ኢዛ ኢሻቲ ካሬ ዪ ኤቂዲኔ ኣሴ ኢዛኮ ከቲ ጴይጊሲዳ።

32 ኢዛ ገደሉ ኡቲዳ ዳሮ ኣሳይ፥ «ሄኮ ኔ ኣዬያኔ ኔ ኢሻቲ ካሬን ኤቂዲ ኔና ኮዬቲሰ» ገደ።

33 ኢዚካ ዛሬዲ፥ «ታ ኣያ ኦኔ? ታ ኢሻቲ ኦናንቴ?» ገደሰ።

34 ኢዛ ዩዪ ኡቲዳ ኣሳኮ ጴሊዲ፥ «ታ ኣዬያኔ ታ ኢሻቲ ሃይታንታኮ!

35 ጸሳ ሼኔ ኦሒዛይ ወሪ ኢዚ ታ ኢሻ፥ ታ ሚቾኔ ታ ኣዮ» ገደሰ።

## 4

ዜሬል ዜሪዛዴ ለሚሶ

(ማቶ 13:1-9፤ ሉቃ 8:4-8)

1 ቃሴ ዩሱሲ ሃራ ዋዴ ኣባ ኣቻን ታማርሶ ኦይኪዳሰ። ኢዛኮ ኬሂ ዳሮ ዳሬይ ሽቂዳ ገሻሰ ኣባ ገደን ዲዛ ዋጎሎ ዲዛሪን ጌሊዲ ኡቲዳሰ፤ ኣሳይካ ወሪ ኣባ ኣቻን ሽቂዳሰ።

2 ኢዚካ ዳሮ ዮኦታ ለሚሶን ሂዘጊ ታማርሲዳሰ።

3 «ሲዪቴ! ኢሳዳይ ዜሬል ዜራናሰ ኬዚዳሰ።

4 ኢዚ ዜሪሺን ኢሲ ኢሲ ዜሬል ኦጌ ቦላ ዋዲዳሰ። ኦጌ ቦላ ዋዲዳ ዜሬላ ካፎቲ ማጺ ሚዳ።

5 ባጋይ ማላ ቢታን ዋዲዳስ። ሄ ቢታይ ማላ ገዲዳ ገሻስ ሄራካ ጫሪዳስ።

6 ገደ ኣቲን ኣርሼይ ኬዚዳ ማላ ሹሊዲ ጸጸ ዩደንታ ገሻስ ማሊዳስ።

7 ቃሴ ኢሲ ዘሬሊ ኣጉንፋ ገደን ዋዲዳስ፤ ኣጉንፋይካ ዲጨዲ ጩሊዳ ገሻስ ኣይፊቤና።

8 ሃራ ዘሬሊ ቃሴ ሎኦ ኦርዳ ቢታ ቦላ ዋዲዳ ገሻስ ጫሪዲ ዲጨዳስ፤ ኣይፊካ ኣይፊዳስ፤ ኢሶይ ሄቹ ታሙ፥ ኢሶይ ቃሴ ኡሱፑን ታሙ፥ ኢሶይ ቃሴ ጸቱ ኣይፊዳስ።»

9 ዩሱሲ ቃሴካ፥ «ሲዩዛ ሃይሊ ዲዛዳይ ሲዮ!» ገዳስ።

ዩሱሲ ለሚሶራ ዮቲዛ ጋሶ

(ማቶ 13:10-17፤ ሉቃ 8:9-10)

10 ዩሱሲ ባርካ ዲሺን ታማኔ ናሞኣቲኔ ካሴ ኢዛራ ዲዛ ኣሳይ ኢዚ ዮቲዳ ለሚሶዛ ገሻስ ኢዛ ዛሪ ኦይቹዳ።

11 ኢዚካ ኢስታስ፥ «ኢንቴስ ጸሳ ካዋቴፋ ጸራ ኤሮይ ጌሊዳስ ሺን ካሬን ዲዛይታስ ገዲኮ ዮኦይ ዉሪ ለሚሶራ ዮቲቴስ።

12 ሄሲካ ካሴ፥ «ኢስቲ ቤኢዲ ቤኢዳይሳ ኣኬኮንታ ማላኔ ሲሞንታ ማላ፥ ቃሴካ ኢስታ ናጋራይ ማሬቶንታ ማላኮ» ገዳስ።

13 ቃሴካ ዩሱሲ፥ «ሃይሲ ለሚሶይ ኢንቴስ ጌሊቤኔ? ሂስቲን ሃራ ለሚሶ ኢንቴ ዋስቲ ኤራኔ?

14 ዘሪዛዳይ ቃላ ዘሬስ።

15 ኢሲ ኢሲ ኣሳቲ ኦጌ ቦላ ዋዲዳ ዘሬፋ ሚሳቴቴስ፤ ኢስቲ ቃላ ሲዩዛ ዋዳ ጸላኤይ ዩዲ ሄራካ ኢስቲ ሲዩዳ ቃላ ኢስታ ዋዚናፔ ኤኪቹስ።

16 ሄሳፉካ ሃራቲ ማላ ቢታ ቦላ ዋዲዳ ዘሬፋ ሚሳቴቴስ። ኢስቲ ቃላ ሲዩዲ ኡፋይሳን ኤኬቴስ።

17 ገደ ኣቲን ኢስቲ ጸጸ ዩደንታ ገሻስ ጉፋ ዋዳ ጋሞኢሺን ቃላ ጋሶን ሜቶይ ዋይኮ ጎዳታይ ኣሳታ ቦላ ዩዛ ዋዳ ሄራካ ጵጵቴቴስ።

18 ሃራቲ ቃሴ ኣጉንፋ ገደን ዋዲዳ ዘሬፋ ሚሳቴቴስ፤ ኢስቲ ቃላ ሲስ ሲዩቴስ።

19 ገደ ኣቲን ሃ ቢታ ሜቶይ፥ ሚሻ ሲቆይኔ ሃራ ኣሞይ ኢስቲ ሲዩዳ ቃላ ጩሊዲ ኣይፊ ኣይፎንታ ማላ ዲጌስ።

20 ሃንኮይቲ ሎኦ ቢታን ዘሬቲዳ ዘሬፋ ሚሳቴቴስ፤ ሄይቲካ ቃላ ሲዩዲ ኤኪዛዳኔ ሄቹ ታሙ ኣይፊ፥ ኡሱፑን ታሙ ኣይፊኔ ጸቱ ኣይፊ ኣይፊዛይታ» ገዳስ።

ጌማን ዲዛ ጸምፔ

(ሉቃ 8:16-18)

21 ቃሴካ ዬሱሲ፡ «ጸምፔ ኦይሊዲ ጌማሶን ወይኮ ኣርሳ ጋርሳን ዋሊ ኤሬቲ? ፖኣና ማላ ቆንጮሶን ዋሌታ ጌዴኔ?

22 ሄሳ ጊሻስ ቆቴቲዲ ቆንጮ ኬዘንታይ፡ ፖኣን ኬዘንታ ጌማን ኣታናይ ባ።

23 ሄሳ ጊሻስ ሲዪዛ ሃይሊ ዲዛዴይ ሲዮ!» ጌዴሰ።

24 ጉጂዲካ፡ «ኢንቲ ሲዪዛይሳ ዋዚናን ዋሊቲ፤ ኢንቲ ማኪዛ ሚሻራ ኢንቲስ ማኬታና፤ ሄሳፊካ ዳሮይ ጉጃታና።

25 ዲዛዴሰ ጉጃታና ሺን ባይንዳዴፊ ኢዛሰ ዲዛራካ ኤኬታይቻና» ጌዴሰ።

ዲጨዛ ዜሬላ ለሚሶ

26 ቃሴካ ዬሱሲ፡ «ጸሳ ካዎቴሊያ ዜሬላ ዜሬዛ ኢሲ ኣሰ ሚሳታዉስ።

27 ዜሬዳዴይ ኦማርሰ ጺስኬስ። ዎንቲሺን ዴንዴሰ፤ ጌዶ ኣቲን ኢዚ ኤርንታ ዲሺን ዜሬቲዳ ካላይ ሞኪዲ ዲጨሰ።

28 ጋዴያካ ኮይሮ ጫሬቹ፡ ካሌላዳ ፑጴ፡ ቃሴካ ፑጴዛ ቦላ ሎኦ ኣይፊ ኢማዉስ።

29 ካላይ ካዲዳፔ ጉዬ ቦኔይ ጋኪን ኬላ ኣዋይ ሄራካ ማጸ ኦይኬስ» ጌዴሰ።

ሳናፊጮ ሚላ ኣይፊ ለሚሶ

30 ዬሱሲ፡ «ጸሳ ካዎቴላ ኦ ኣዛራ ጊኒሳኔ? ኣዛራ ለሚሳኔ?

31 ቢታ ቦላ ኡባፊ ላፋ ጊዲዳ ሳናፊጮ ኣይፊ ሚሳታዉስ።

32 ዜሬታዳ ዲጨዳፔ ጉዬ ቃሴ ኣታኪልቲታ ኡባፊ ኣጂዛ ጊሻስ ካፎቲ ዪዲ ሄ ኣታኪልቲይ ሃጋታ ኩዋ ጊዶን ሸምፔቲስ» ጌዴሰ።

33 ዬሱሲካ ኣሳይ ኤካናሰ ዳንዳይዛይሳ ኬና ሃይታ ሚሳቲዛ ሃራ ዳሮ ለሚሶራ ኢስታሰ ዮቲዴሰ።

34 ኣይ ሚሽ ጊዲኮካ ኣሳሰ ለሚሶይ ባይንዳ ዮቲ ኤሬና። ኢዚኔ ኢዛ ካሊዛይቲ ጸላ ዲዛ ዋዴ ጊዲኮ ዉርሲ ቢርሺ ዮቲስ።

35 ሄ ጋላሰ ጋዴይ ቃሚሺን ባና ካሊዛይታ፡ «ኣኔ ጌዴ ሄ ፒንላ ፒኖስ» ጌዴሰ።

36 ኢስቲ አሳ ሄን አጋጊዲ ኢዚ ኡቲ ዲዛ ዋጎሎዛራ ዬሱሳ ኤኪ ቢዳ። ሃራ ዋጎሎቲካ ኢስታራ ኢሲፌ ዳቴሰ።

37 ሄ ዋዴ ዋልቃማ ዳምባላይ አባ ቦላ ዴንዲዲ ዋጎሎዛ ሃላ ኩማና ጋካናሰ ሾጮቹዴሰ።

38 ጊዶ አቲን ዬሱሲ ቦርኮላ ቦርኮቲዲ ዋጎሎዛሰ ጉዬ ባጋን ኢቺዴሰ። ኢስቲካ ኢዛ ዴንፊዲ፥ «አስታማሬ! ኑኒ ሳይሺን ኔና ሜቴኔ?» ጊዳ።

39 ኢዚካ ዴንዲዲ ጫርኮዛ፥ «ጮኡ ጋ!» አባካ፥ «ዎፑ ጋ!» ጊዴሰ፤ ጫርኮይካ ጮኡ ጊዴሰ፤ ሙሊካ ጮኡ ጊዴሰ።

40 ባና ካሊዛይታካ፥ «ሃይሳሶ አዛሰ ባቢዴቲ? ሃይሳ ጋካናሰ ኢንቴሰ አማኖይ ባዌ?» ጊዴሰ።

41 ኢስቲካ ኩሂ ባቢዲ ባ ጊዶን ኢሶይ ኢሳራ፥ «ጫርኮይኔ አባይ ኢዛሰ አዛዜቲዛይ ሃይሲ ኑኔ?» ጌቴቲዳ።

## 5

ዬሱሲ ቱና አያናፔ ፓሊዳዴ

(ማቶ 8:28-34፤ ሉቃ 8:26-39)

1 አባ ፒኒዲ ጌዴ ጌርጌሴኖኔ ጌቴቲዛሶ ቢዳ።

2 ዬሱሲ ዋጎሎይፔ ዎዲዳ ማላ ቱና አያናይ ኢዛ ቦላ ዲዛዴይ ዲፎፔ ኬዚዲ ዬሱሳራ ጋጋና ኢዛኮ ዪዴሰ።

3 ሃይሲ አዴዚ ዲፎሶን ዲዛዴኔ ሃራይ አቶሺን ኦኒካ ኢዛ ሳንሳላታንካ ቃቻናሰ ዳንዳይቤና።

4 ዳሮ ዋዴ ቶሆ ቢራታራኔ ሳንሳላታራ ቃሼቴሰ። ጊዶ አቲን ኩሼ ሳንሳላታ ዲሴሊ ዬጌሰ፤ ቶሆ ቢራታካ ሜንጮሬሊ ዬጌሰ፤ ኦኒካ ኢዛ ኦይኪዲ ቴቃናሰ ዳንዳይቤና።

5 ጋላሲኔ ቃማ ዲፎታ ጊዶኒኔ ዙማታ ቦላ ዩዩ ዩዩ ዋሲሼ ባ ቦላ ሹቻራ ቃንጾሬሊዲ ማዲንጮሰ።

6 ኢዚካ ዬሱሳ ሃሆን ቤኢዳ ማላ ዎላን ኢዛኮ ዪዲ ኢዛ ሲንላን ጉልባቲዲ ጎይኒዴሰ።

7 ኬሂ ዋሲዲ፥ «ሃይሶ ዎጋ ጸሳ ና ዬሱሳ፥ ኔሰ ታናራ አዚ ዲዜ? ጸሳ ሱንላን ታ ኔና ዋሳይሰ ታና ዋዩሶፓ» ጊዴሰ።

8 ኢዚ ሄሳ ጊዳይ ዬሱሲ ካሴ፥ «ኔኒ ቱና አያናይ ሃይሳፌ ኬዛ» ጊዳ ጊሻሳ።

9 ሄሳፌ ቃሴ ዩሱሲ ኢዛ፡ «ኔ ሱንሊ ኦኔ?» ጊዲ ኦይቺደስ።  
ኢዚካ፡ «ኦኔ ዳርታ ጊዲዳ ገሻስ ታ ሱንሊ ሌጎኔ \* ጌቴቴስ»  
ጊደስ።

10 ሄ ዳሬፔ ኬሲ ዩዶንታ ማላ ዩሱሳ ኬሂ ዋሲደስ።

11 ሄን ማታን ዙማ ቦላ ዳሮ ጉዲንሊ ሄሜቴስ።

12 ቱና ኣያናቲ፡ «ኦ ጉዲንላታን ጌላና ማላ ኮስ ኤሮ ጋርኪ?»  
ጊዲ ዩሱሳ ዋሲዳ።

13 ኢዚካ ኢስታስ፡ «ኤሮ» ጊደስ። ቱና ኣያናቲካ ኣዳዘፔ  
ኬዚዲ ጉዲንላታን ጌሊዳ። ናምኡ ሺ ጊዲዛ ጉዲንላቲ ወሪ  
ኣፎዛራ ዱጉላ ጌንዳሬቲ ዋጂዲ ኣባን ሚቴቲዳ።

14 ጉዲንላ ሄሚዛይቲ ባቃቲዲ ሃኒዳይሳ ካታማኒኔ ዳሬ ጊደን  
ዮቲዳ። ዳሬይካ ሃኒዳይሳ ቤያናስ ባ ዲዛሶፔ ዲዛሶፔ ኬዚደስ።

15 ዩሱሳኩ ዩዲ ዳሮ ዳይዳንሊ ኢዛ ቦላ ዲዛ ኣዳዘ ዋዚናይ  
ኢዛስ ሰሚን ማይኦ ማይኢዲኔ ዋጋራ ኡቲዳይሳ ዩዳ ኣሳይ  
ቤኢዲ ባቢደስ።

16 ሃይሳ ቤኢዳ ኣሳይ ዳይዳንሊ ኢዛ ቦላ ዲዛ ኣዳዘ ገሻሲኔ  
ጉዲንላቲ ሃናይሳ ዳሬዛስ ዮቲደስ።

17 ሄሳፌ ጉዬ ሄ ዳሬ ኣሳይ ዩሱሲ ኢስታ ዳሬ ዩዲዲ ባና  
ማላ ዋሲደስ።

18 ዩሱሲ ዋጎሎን ጌሊሺን ዳይዳንላቲ ኢዘፔ ኬዚዳ ኣዳዚ  
ዩሱሳራ ዳናስ ዋሲደስ።

19 ዩሱሲ ቃሴ ኢዚ ኦይቺዳይሳ ኣካይ ጊዲ፡ «ኔኒ ጌዴ ኔሶ  
ባ፤ ጎዳይ ኔስ ኣይ ማላ ጌታ ሚሽ ኦሊዳኮኔ ኢዚ ኔስ ኦሊዳ  
ማርቲፋ ኔሶ ኣሳስ ዮታ» ጊደስ።

20 ኣዳዚካ ባሶ ቢዲ ዩሱሲ ኢዛስ ኦሊዳ ጌታ ሚሽ ወርሲ  
ታሙ ካታማ ጌቴቲዛ ዳሬን ዮቲን ሲዩዳይ ወሪካ ማላሌቲደስ።

21 ቃሴካ ዩሱሲ ዋጎሎን ጌሊዲ ጌዴ ፒንሐ ፒኒዲ ኣባ ኣቻን  
ዲሺን ዳሮ ኣሳይ ኢዛ ኣቶ ሺቂዲኔ ኢዛ ጊዶሊደስ።

22 ኣይሁዳታ ዋጎ ኬላ ሃላቃታፔ ኢሶይ ኢያኢርሳ ጌቴቲዛይሲ  
ኢዚ ዲዛሶ ቢዲ ዩሱሳ ዳሚዳ ማላ ኢዛ ቶሆ ቦላ ኩንዲዲ

23 «ታስ ጉላ ና ዲዛራ ሃይቃና ጋወስ። ኢዛ ሃይቆንታ ፓጳ  
ዳና ማላ ኔ ሃ ያዳ ኔ ኩሼ ኢዚ ቦላ ዋላርኪ?» ጊዲ ኬሂ  
ዋሲደስ።

24 ዩሱሲካ ኢዛራ ኢሲፌ ቢደስ። ዳሮ ኣሳይ ኢዛ ኡንኤላና  
ጋካናስ ካሊደስ።

\* 5:9 ሌጎኔ፡ ሌጎኔ ጉሲ ዳሮ ዋታዳራታ ቡቴ [ጨፍራ] ጉሳ።

25 ታማኔ ናምኤ ላይህ ኩሜል ሱሌ ኢዚ ቦላፌ ጉኪዛ ማጫሰ ዲዛራ ሄን አሳራ ዳወሰ።

26 ኢዛ ባስ ዲዛ ሚሽ ወርሳና ጋካናስ አኪሜፔ አኪሜ ላምን ዳሮ ዳቡራዲስ። ጊዶ አቲን ሳኮይ ኢዚስ ጌዴ ዳሪዴስ አቲን አይኮካ ሎኢቤና።

27 ኢዛ ዬሱሳ ገሻሰ ሲዱዳ ማላ አሳ ጊዶራ ዬሱሳ ጉዬራ ካላዳ ኢዛ ማይኦ ቦቻዲስ።

28 ጋሶይካ፥ «ታ አይ ሃናዳካ ኢዛ ማይኦ ኩሼራ ቦቻ ቦቹዳኮካ ፓጻና» ጋዳ ቆፒዳ ገሻሳ።

29 ጉኪዛ ሱላይ ሄራካ ኤቂ አጊዴስ፤ ኢዛካ ፓጺዳይሳ ባ አሳቴላን ኤራዲስ።

30 ባፔ ዋልቃይ ኬዚዳይሳ ዬሱሲ ኤሪዲ ጌዴ አሳኮ ሲሚዲ፥ «ታ ማይኦ ኦኔ ቦቹዳይ?» ጊዴስ።

31 ኢዛ ካሊዛይቲ ቃሴ፥ «ሃይሲ ዴሬይ ኦንኤቲዲ ሱጌቲሺን ቤያሽ ዋናዳ፥ «ታና ቦቹዳይ ኦኔ?» ጋይ» ጊዳ።

32 ዬሱሲ ሄሳ ኦሊዳይ ኦናኮኔ ቤያናስ ዩሺ ጸሊዴስ።

33 ማጫሳያካ ባስ አዚ ዋኒዳኮ ኤራዳ ባባሼኔ ኮኮራሼ ያዳ ዬሱሳ ሲንላን ጉፋናዳ ቱማ ወርሳ ኢዛስ ዮታዲስ።

34 ኢዚካ፥ «ታ ናዬ! ኔ አማኖይ ኔና አሺዴስ። ሳሮን ባ! ኔ ዋዬፔ ፓጻ!» ጊዴስ።

35 ዬሱሲ ቡሮ ሃሳያን ዲሺን አይሁዳታ ዋሳ ኬላ ሃላቃ ኢያኢሮሳ ሶፔ ዪዲ ኢያኢሮሳስ፥ «ኔ ናያ ሃይቃዲስ፤ ጎዳ ማላ አዛስ ዳቡሮሳይ?» ጊዳ።

36 ጊዶ አቲን ዬሱሲ ኢስታ ሃሳያ ሌፒ ሂስቲዲ አይሁዳታ ዋሳ ኬላ ሃላቃዛ፥ «ኔ አማኖ ጸላ አማና አቲን ባቦፋ!» ጊዴስ።

37 ጸጽሮሳ፥ ያቆቤራኔ ያቆቤ ኢሻ ዮሃኒሳፔ አቲን ሃራይ ኦኒካ ኢዛ ካላና ማላ ኮዪቤና።

38 ጌዴ አይሁዳታ ዋሳ ኬላ ሃላቃዛሶ ጋኪዳ ማላ አሳይ ዋሲሽ ጫሞ ዬሆ ዬኪዛይሳ ቤዪዴስ።

39 ሶ ጌሊዲ፥ «ሃይሲ ወሪ አዛ ዋሶኔ አዛ ዬሆ? ናያ ጲስካዲስ አቲን ሃይቃቤኩ» ጊዴስ።

40 ቃሴ አሳይ ወሪ ኢዛ ቦላ ሚጪዴስ፤ አሳ ወርሲካ ኬላፌ ኬሲዲ ናዪ አዋኔ ናዪ አዪዮ ቃሴካ ኢዛራ ኢሲፌ ዪዳይታ ኢዛ ካሊዛይታ ጸላ ካሌሊዲ ናያ ዲዛሶ ጌሊዴስ።

41 ናይ ኩሼካ ኦይኪዲ፥ «ጸቢታ ኩሞ!» ጊዴስ። «ጸቢታ ኩሞ!» ጉሳስ ቢርሼሊ፥ «ሃኔ ናዬ ዴንዳ» ጉሳ።

42 ናያካ ሄራካ ዴንዳ ኤቃዱስ፤ ያኔ ሃ ሄሜታዱስ። ኢዚስካ ላይላይ ታማኔ ናሞኣ፤ አሳይካ ሄ ሃኖዛን ዳሮ ማላሌቲዳስ።

43 ዩሱሲ ሃይሳ ኦኒካ ኤሮንታ ማላ ኬሂ ሚንሉ ዮቲዳስ፤ «ናይስ ማና ቁማ ኢሚቲ» ገዴስ።

## 6

ናዚሬቲ አሳይ ዩሱሳ ኤኪቤና

(ማቶ 13:53-58፤ ሉቃ 4:16-30)

1 ሃሳፌ ጉዬ ዩሱሲ ሄፔ ዴንዲዲ ጌዴ ባ ዴሬ ቢዴስ። ኢዛ ካሊዛይቲካ ኢዛራ ቢዳ።

2 አይሁዳታ ሳሞባታይ ጋኪን አይሁዳታ ዋሳ ኬሌ ጌሊዲ ታማርሲሽን ሲዱዳ አሳይ፡ «ሃይሲ አዴዚ ሃይሳ ዉርሲ አዋፔ ኤኪዴ? ሃይሲ ኢዛስ ኢሜቲዳ ኤራቴላይ አዜ? ቃሴ ሃይቲ ኢዚ ኦሉዛ ማላታቲ ዋኒ ኢዛ ኩሼን ሃኒዞ?» ገሼ ማላሌቲዳ።

3 «ሃይሲ አናጼዛ ገዴኔ? ማራሚ ና ያቆቤንታ ዮሳንታ፡ ዩሁዳንታኔ ሲሞናንታ ኢሻ ገዴኔ? ኢዛ ሚቹቲ ኦናራ ሃን ኦ ማታን ዲዛይታ ዴቴኔ?» ገዲ ሃሳፌ ዴንዲዳይሳን ኢዛን ኡፋዬቲቤቲና።

4 ዩሱሲካ ኢስታስ፡ «ናቤይ ቦንቹቶንታይ ባ ዴሬን ባ ዳቦታ ገደኒኔ ባሶ አሳ አቻን ጸላ» ገዴስ።

5 ሄን ጉላ ሃርጋንቻታ ቦላ ኩሼ ዋሉ ፓሶሬፔ አቲን ሃራ አይኮ ማላታካ ኦላናስ ዳንዳይቤና።

6 ኢስታስ ኢማኖይ ባይንዳይሳ ቤኢዲ ማላሌቲዳስ። ሃሳፌካ ዩሱሲ ጉታን ጉታን ዩዩ ዩዩ ታማርሲዳስ።

ዩሱሲ ከቲ ዩዲዳ ታማኔ ናሞኣታ

(ማቶ 10:5-15፤ ሉቃ 9:1-6)

7 ታማኔ ናሞኣታ ባኮ ጸይጊዲ ናሞኡ ናሞኡ ሂስቲ ከቲሼ ቱና አያናታ ቦላ ኢስታስ ጎዳቴሰ ኢሚዳስ።

8 ኢዚ፡ «ኦጌስ ገዲዛ ጉፌ አቲን ኦጌ ሺንቄ ዋይኮ ኮሮጆ ዋይኮ ሚሼ ኦይኮፍቲ።

9 ጫማ አሉቲ ገዶ አቲን ላማና ማይኦ ኦይኮፍቲ።

10 ኢሲ ኬሌ ኢንቴ ጌሊኮ ሄ ካታማፔ ኢንቴ ኬዛና ጋካናስ ሄ ኬላን ዲቲ።

11 አዋንካ ኦኒካ አንቴና ሞኪ ኤኮንታ ኢጲኮ ሄፔ ኬዚሼ ሄ ዳሬታ ቦላ ማርካ ጊዳና ማላ አንቴ ቶሆ ቦላ ዲዛ ጉዲላ ቆቆፍቴ» ጊዲ አዛዚዳስ። \*

12 ኢስቲካ ሄፔ ኬዚዲ ዳሬይ ማርቴላን ጌላና ማላ ሳባኪዳ።

13 ዳሮ ዳይዳንላታ ኬሲዳ፤ ዳሮ ሃርጋንቻታ ዛይቴ ቴዬ ቴይዲ ፓሊዳ።

ጸማቂዛ ዮሃኒሳ ሃይቆ

(ማቶ 14:1-12፤ ሉቃ 9:7-9)

14 ዩሱሳ ሱንሊ ካሴፔ ኤሬቲ ኤሬቲ ቢሺን ካዎ ሄርዶሲ ሄሳ ሲዬዳስ። ኢሲ ኢሲ አሳቲ፤ «ሃይሳ ማላ ማላታታ ኦሊዛይ ጸማቂዛ ዮሃኒሲ ሃይቆፔ ዳንዲና» ጊዳ።

15 ባጋይቲ፤ «ኤላሳ» ጌቲስ፤ ባጋ አሳይ ቃሴ፤ «ካሴ ናቤታፔ ኢሳ ሚሳቴስ» ጌቲስ።

16 ሄርዶሲ ዮኦዛ ሲዬዲ፤ «ታ ኢዛ ቆጼ ቃንጸሲዳ ዮሃኒሲ ሃይቆፔ ፓጺ ዳንዲዳስ» ጊዳስ።

17 ሄርዶሲ ባ አሻ ፒሊጶሳ ማቾ ሄርዲያዶ ኤኪዳ ጋሶን ኦይኬቲዲ ቃሽታና ማላ አዛዚዲ ዮሃኒሳ ቃሾ ኬሌ ጌልሊዳስ።

18 ዮሃኒሲ ሄርዶሳ፤ «ኔ አሻ ማቾ ኔ ኤኮንታ ማላ ዋጋይ ኔና ዲጌስ» ጊዳ ጊሻስ ቃቺዳስ።

19 ሄርዲያዶ ሄሳ ጊሻስ ሆሎታዳ ኢዛ ዋጲሳናስ ኮያዱስ ሺን ዳንዲያቤኩ።

20 ጋሶይካ ዮሃኒሲ ጸሎኔ ጌሻ አስ ጊዲዳይሳ ሄርዶሲ ኤሪዛ ጊሻስ ዮሃኒሳስ ባቤሲኔ ኢዛ ናጌስ። ዮሃኒሲ ዮቲዛይሳ ሄርዶሲ ሲዬዲ ሄርጊዛ ጊዲኮካ ኢዚ ዮቲዛይሳ ዋዚናፔ ሲዬስ።

21 ሄርዶሳ ዩሌታ ጋላስ ቦንቻናስ ጶቃ ሹሜታስ፤ ኦላ ዋታዳራታ አዛዚዛ ዋናታሲኔ ጋሊላ ቢታን ኬሂ ኤሬቲዛ ጊታ አሳታስ ገቢራ ኬሲዳስ፤ ሄሲካ ሄርዲያዶስ ገጋ ጋላስ ጊዲዳስ።

22 ሄርዲያዲ ማጫ ናያ ጌላዳ አሳ ሲንላን ማዛሙራ ዩጸን ሄርዶሳኔ ኢዚ ጴይጊዳ አሳ ኢዚ ዩሳይ ኡፋይሲዳስ። ካዎዚካ ናዮ፤ «ኔ ኮይዛ ሚሽ ኡባ ታና ኦይቻ፤ ታ ኔስ አማና» ጊዳስ።

\* 6:11 ገሊኬ ኦራላ ጫቆ ማጸፋይኔ 1,947 ማርቲላ ላይላን ጸፊቲዳ አማራሶ ጌሻ ማጸፋይ ሃይሳፊ ካሊዲ ዲዛ ቆፋ ጉጄቲስ፤ «አንቴስ ቱማ ጋይስ፤ ሄ ካታማይፔ ሶዶሚስኔ ጋሞራስ ፒርዳ ጋላስ ሎአና።» ሃይሳ ሃ ቆፋይ ገሪኬ ቃላን ቢርሼቲዳ ማጸፋታን ዳና። 6:11 ሃዋ 13:51 6:13 ያቆ 5:14 6:18 ሉቃ 3:19-20

23 ቃሴካ ታ ካዎቴላ ባጋ ጊዲዳኮካ ኔ ኦይቺኮ ኡባ ታ ኔሰ ኢማና ጊዲ ኢዚሰ ጫቂዴሰ።

24 ናያ ኤሌላ ኬዛዳ ባ ኣዬዮ፡ «ካዎዛ ኣይ ኦይቺ?» ጋዲሰ። ኣዲያካ፡ «ጸማቂዛ ዮሃኒሳ ሁኤ ቃንጸዳ ኢማ ጋ» ጋዲሰ።

25 ናያካ ኤሌላ ኬዛዳ ካዎዛኮ ጌላዳ፡ «ጸማቂዛ ዮሃኒሳ ሁኤ ኬሬን ዋላዳ ኔ ታሰ ኢማና ማላ ኮያይሰ» ጋ ኦይቻዲሰ።

26 ካዎይ ሄ ዮኦዛን ዳሮ ሞጴቲዴሰ፤ ጊዶ ኣቲን ጳይጌቲዳ ኢማላ ጊሻሲ፤ ጫቂዳ ቃላ ጊሻሰ ኢዚሰ ኣካይ ጋናሰ ኮዬቤና።

27 ሄሳ ጊሻሰ ዋታዳራታፔ ኢሳ ኤሶን ከቲዲ ዮሃኒሳ ቆጼ ቃንጸዲ ኢዛ ሁኤ ኤኪ ያና ማላ ኣዛዚዴሰ፤ ኢዚካ ቢዲ ቃሾ ኬላ ጊዶን ዮሃኒሳ ቆጼ ቃንጸዲዴሰ።

28 ሁኤዛ ኬሬራ ኤሂዲ ናይሰ ኢማዴሰ፤ ናያካ ባ ኣዬይሰ ኢማዲሰ።

29 ዮሃኒሳ ካሊዛይቲካ ሄሳ ሲዬዳ ማላ ዬዲ ዮሃኒሳ ኣሃ ኤኪ ኤፊዲ ሞጊዳ።

ዬሱሲ ሚዚዳ ኢቻሹ ሺ ኣሳ

(ማቶ 14:13-21፤ ሉቃ 9:10-17፤ ዮሃ 6:1-14)

30 ሄሳፌ ጉዬ ሃዋሬቲ ሲሚዲ ዬሱሳ ኣቻን ዩዩ ኣጲ ባ ኦሊዳይሳኔ ባ ታማርሲዳይሳ ኡባ ኢዛሰ ዮቲዳ።

31 ዳሮ ኣሳይ ዩሼኔ ቢሼ ጊዛ ጊሻሰ ቁማ ሚዛ ዋዴይካ ቤቲቤና፤ «ኣኔ ኢንቲ ጸላ ታናራ ኣሲ ባይንዳሶ ቢዲ ጉሐ ሸምፒ ኤኪቲ» ጊዴሰ።

32 ሄሳ ጊሻሰ ኢሰቲ ባርካ ዋጎሎን ጌሊዲ ኢሲ ኣሲካ ባይንዳሶ ቢዳ።

33 ኢሰቲ ቢሺን ዳሮቲ ቤኢዲ ቶሆራ ዋላን ኢሰታፌ ሲንሌ ኣጲዳ።

34 ዬሱሲ ዋጎሎዛፔ ዋጲዛ ዋዴ ዳሮ ዴሬይ ሺቂ ኡቲዳይሳ ቤዬዴሰ። ሄሚዛዴይ ባይንዳ ሚሂ ማላ ጊዲዳ ጊሻሰ ኣሳሰ ቃጴቲዴሰ፤ ዳሮ ዮኦካ ታማርሶ ኦይኪዴሰ።

35 ሄ ዋዴ ጋዴይ ቃሚ ቃሚ ቢዛ ጊሻሰ ኢዛ ካሊዛይቲ ኢዛኮ ሸቂዲ፡ «ሃይሲ ኑ ዲዛሶይ ባዘኮ፤ ጋዴይካ ቃሚዴሰ።

36 ሃይሳ ሄሬን ኣሲ ዲዛሶ ቢዲ ኣሳይ ባሰ ሚዛ ካሐ ሻሚ ማና ማላ ኣሳ ዬዳ» ጊዳ።

37 ኢዚ ኢስታስ ዛሪዲ፥ «አሳስ ሚዛ ሚሽ ኢንቲ ኢሚቲ» ገደሰ። ኢስቲካ ማላሌቲዲ፥ «ኑኒ ቢዲ ናምኡ ጾቱ ዲናሬራ ካል ሻሚዲ ሃይሳ አሳስ ኢሚዛኮ ገዳንዴ?» ገዳ። †

38 ኢዚካ ኢስታስ፥ «ኢንቴስ አይ ኬና ኡኬላ ዲዛኮ አኔ ቢዲ ጸሊቱ» ገን ኢስቲ ቢ ጸሊዲ፥ «ኢቻሹ ኡኬላኔ ናምኡ ሞሌይ ዴስ» ገዳ።

39 ሄሳፌ ካሊዲ አሳ ጨለላ ማታ ቦላ ቡቴን ቡቴን ኡቲሳና ማላ አዛዚዴስ።

40 አሳይካ ጾቱ ጾቱኔ ኢቻሹ ታሙ ኢቻሹ ታሙ ገዲዲ ቡቴን ኡቲዴስ።

41 ኢዚካ ኢቻሹ ኡኬላታኔ ናምኡ ሞሌታ ባ ኩሼን አይኪዲ ፑዴ ሳሎ ጸሊዲ አንጂዲኔ ኡኬላ ሜንላ ሜንላ አሳስ ገሻና ማላ ባና ካሊዛይታስ ኢሚዴስ፤ ናምኡ ሞሌታካ ኡባ አሳስ ሻኬሬላዴስ።

42 አሳይ ዉሪካ ሚዲ ካሊዴስ።

43 ዬሱሳ ካሊዛይቲ አሳይ ካሊ ሚን አቲዳይሳ ታማኔ ናምኡ ሌማቲ ኩሜል ሺሺዴስ።

44 ካል ሚዳ አሳፔ አቱማሳይ ጸላ ኢቻሹ ሺ።

አባ ቦላራ ዬሱሳ ሄሚታ

(ማቶ 14:22-33፤ ዮሃ 6:15-21)

45 ሄራካ ኢዚ አሳ ሞይዚሼ ኢዛ ካሊዛይቲ ሲንፋቲዲ ጌዴ ፒንል ቤቴሳይዳ ጌቲቲዛሶ ፒናና ማላ አዛዚዴስ።

46 ሄፔካ ኢስታ አጋገዲ ዋሳናስ ፑዴ ዙማ ቦላ ኬዚዴስ።

47 ጋዴይ ቃሚን ዋጎሎይ አባ ገደን ዲሺን ኢዚ ባርካ ቢታ ቦላ ዴስ።

48 አባ ቦላ ጫርኮይ ኬሂ ሜቲዳ ገሻስ ኢዛ ካሊዛይቲ አባ ሺሪ ሺሪ ዋጎሎ ላገዛ ሚሻራ ባጽቲሺን ዬሱሴ ቤዪዴስ። ዋንታ ቦላ ኢስታኮ ዪዴስ፤ ዪዲኔ ኢስታ አቻራ አጂ ባናሶ ሃኒዴስ።

49 ገደ አቲን አጂ ባና ሃኒሺን ኢዛ ቤኢዳ ማላ ሞይቲሌ ቤይዳ ሚሳቲን ዉሪካ ዋሲዳ።

50 ዉሪካ ኢዛ ቤኢዲ ዳጋሚዳ፤ ኢዚካ ሄራካ ኢስታ ዮቺዲ፥ «አይኮይ ባ፤ ታናኮ ዳጋሞፍቲ!» ገዴስ።

51 ኢዚካ ዋጎሎን ኢስታኮ ጌሊን ጫርኮይ ጮኡ ገዴስ፥ ኢስቲካ ዳር ማላሌቲዳ።

† 6:37 ሄ ዋዴ 200 ዲናሬ ዴማናስ ኢሲ አሲ 200 ጋላስ ኦላናስ ኮሼስ።

52 ካሴ ኢዚ ኡኩፋን ኦሊዳ ማላታ ቢርሼል ኢሰቲ ኤርንታ ገሻሰ ኢሰታ ዋዚናይ ዶጪዴስ።

53 አባ ፒኒዲ ገንቤሬዴ ጌቲቲዛሶ ጋኪዳ፤ ዋሳላፔ ዋጂዲ ዋሳሎዛ ሄን ቃቺዲ አገ ቢዳ።

54 ኢሰቲ ዋሳሎፔ ዋጂዳ ማላ አሳይ ዩሱሳ ኤሪዴስ።

55 ወሪካ ባ ዲዛሶ ዲዛሶ ዋጆሬቲዲ ሃርጋንቻታ ሃላን ቶኪ ቶኪ ኤኪዲ ዩሱሲ ዲዛሶ ኤሂዳ።

56 ኢዚ ጋኪዳ ጉታን ዋይኮ ካታማ ጊዶን ዋይኮ ዴሬ ጊዶን ጊዶን ሃርጋንቻቲ ኢዚ አጂሺን ኢዛ ዋሲዲኔ ኢዛ ማይኦ ቦቺዲ ፓጻና ማላ ሺሺ ሺሺ ዱቡሻይ ዲዛሶን ዋሊዳ። ኢዚ አጂ ቢሺን ኢዛ ማይኦ ቦቺዳይቲ ወሪ ፓጺዳ።

## 7

ካሴ አይሁዳ አዋታ ዋጋ

(ማቶ 15:1-9)

1 ሄሳፌ ጉዬ ፋርሳዊቲኔ ዩሩሳላሜፔ ዩዳ ኢሲ ኢሲ ጻፌቲ ዩሱሳ ላንቄን ዩዩ አጂዳ።

2 ዩሱሳ ካሊዛይታፔ ባጋይቲ ሜጩቶንታ ቂታ ኩሼራ ካል ሚሺን ቤኢዳ።

3 ፋርሳዊቲኔ ካሴ ጪማ አይሁዳ አሳቲ ካሴ ዴሬ ዋጋ ናጋናሰ ኩሼ ሎኤሊ ሜጩቶንታ ካል ሚ ኤሬቴና።

4 ጊያ ቢ ሲሚኮካ ቦላ ሜጩቲ ጌዮንታ ዲሼ ካል ሚ ኤሬቴና። ሄሳቶካ ዋንጫካ፥ ኦቶካ፥ ኬሬካ፥ ኢቺዛ ሂፊካ ሜቻ ማላ ሃራ ዋጋታካ ናጌቲስ።

5 ፋርሳዊቲኔ ጻፌቲ ዩሱሳ፥ «ኔና ካሊዛይቲ ካሴ አዋታ ዋጋ ማላ ዱስ አገዲ አዛሰ ኩሼ ሜጩቶንታ ካል ሚዞ?» ጊዲ ኦይቺዳ።

6 ኢዚካ ኢሰታስ፥

«ኢሳያሲ ቆጂፔ ቆሞን

ሃኒዛ እንቲ ገሻሰ፥

ኦሃይሲ ዴሬይ

ባ ሜቴርሻን ጸላላ

ታና ቦንቺስ፤

ዋዚናይ ጊዲኮ

ታፔ ሃኪዴስ።

7 ታሰ ሜላ ሃዳ ጎይኔስ፤

ኢሰታ ቲሚርቲይካ

እሲ ዋሊዳ ዋጋ ጸላ፤

ጊዲ ዮተዳይሲ ቱማ» ጊዴስ።

8 ጸላ ዋጋ እጊዲ እሲ ዋሊዳ ዋጋ ናጌቴስ።

9 ቃሴካ፤ «እንቴ ዋጋሰ ጊዲ ጸላ ዋጋ እንቴ ኣጋጊዛ ጨንጫቴላ ኦጌይ እንቴስ ዴስ።

10 ኣይሰ ገኮ ሙሴይ፤ ሓ ኣዮኔ ኔ ኣዋ ቦንቻ፤ ባ ኣዮኔ ባ ኣዋ ጫዪዛዴይ ሙሉካ ሃይቆ» ጊዴስ።

11 ጊዶ ኣቴን እንቴ ቃሴ፤ ሓሲ እሲ ባ ኣዋ ዋይኮ ባ ኣዮ እንቴ ታፔ ዴማናሰ ኮሺዛ ማዶ ታ ጸላሰ እማዲሰ» ገኮ፤

12 እንቴ ቃሴ ሃይሳዴይ ባ ኣዋሰካ ባ ኣይይሲ ሃራ ኣይኮካ ኣፋና ማላ ኮዬኬታ።

13 ሄሳ ገሻሰ እንቴ ዋጋ ናጋና ጊዲ ጸላ ቃላ ላማታ። ሄይታንታ ሚሳቴዛ ዳርታ ኦሴታ» ጊዴስ።

14 ቃሴካ ዬሱሲ ኣሳ ባኮ ጳይጊዲ፤ «ወሪካ ታ ጊዛ ሰዪቴኔ ዋዚናን ዋሊቴ።

15 ካሬፔ ኡሎ ጊዶ ጌሊዲ ኣሰ ቱኒሲዛ ኢሲ ሚሺካ ዴና፤ ሃራፔካ ኣሴ ቱኒሲዛይ ኬላ ኣዋፔ ጌዴ ካሬ ኬዚዛ ሚሻ።

16 ሲዪዛ ሃይሊ ዲዛይ ሲዮ!» ጊዴስ። \*

17 ኢዚ ኣሳ ካሬን ኣጊዲ ኬፍ ጌሊን ኢዛ ካሊዛይቲ ኢዚ ዮተዳ ለማሶዛ ቢርሼል ዬሱሳ ኦይቺዳ።

18 ኢዚካ ኢሰታ፤ «እንቴሰካ ዮኦይ ጌሌኔ? ካሬፔ ጌሊዲ ኣሴ ቱኒሲዛ ሚሺ ኣዚካ ዴና።

19 ካሬፔ ጌሊዛይ ጌዴ ዋዚናን ጊዶንታ ዲጌ ቃንላ ጊዶ ጌሌሰ፤ ቃሴ ሄፔ ኢዛዴ ኣሳቴላፌ ጌዴ ካሬ ኬዜሰ» ጊዴስ፤ ዬሱሲ ሄሳ ጊዳይ ኣሲ ሚዛ ካሊ ወሪካ ጌሽ ጊዲዳይሳ ቆንጨሳናሳ።

20 ካሌሊዲካ፤ «ኣሳፔ ኬዚዛዚ ኣሴ ቱኒሴስ።

21 ኣሳ ዋዚና ጊዶፌ ኬዚዛይ ኢታ ቆፋታ፤ ላይማ ኣሞኔ ካይሶቴል፤ ኣሴ ዋጵ፤ ላይማቴል፤

22 ዪቄቴል፤ ኢታቴል፤ ባሌሶ፤ ላይማ ካሰ፤ ቃናቴቴል፤ ኣሳ ሱንል ሞር፤ ኦቶራቴሊኔ ኣዛላ።

23 ሃይቲ ኢታ ሃኖቲ ወሪ ኣሳፔ ኬዜቴሲኔ ኣሴ ቱኒሴቴስ» ጊዴስ።

እሲ ማጨሳይ ኣማኖ  
(ማቶ 15:21-28)

7:10 ኬሳ 20:12፤ 21:17፤ ዛሬ 5:16፤ ሉዌ 20:9  
ማጻፋቲ ታይቦ 16 ቦላ ዲዛ ቆፋ ጉጃቴስ።

\* 7:16 ኢሲ ኢሲ ጌሻ

24 ዩሱሲ ሄፔ ከዚሁ ጸረሴ ጌቲቲዛ ዴሬ ቢዴስ፤ ሄን አሳዴ ከሌ ጌሊዲ እዚ ሄን ዲዛይሳ አሲ ኤርንታ ማላ ኮዪዴስ። ጊዶ አቲን እዚ ሄን እዛ ዲሳይ ቆቲታናሰ ዳንዳዬቲቤና።

25 ሄራካ እሲ ቱና አያናይ ኦይኪዳ ጉላ ና ዲዛሪ አያ ዩሱሲ ሄን ዲዛይሳ ሲያዳ እዛኮ ያዳ እዛ ቶሆ ቦላ ኩንዳዲስ።

26 ማጫሳያ ጊሪኬ ቃላ ሃሳይዛ ማጫስ ሺን እዛ ዬሌቲዳሶይ ሲርፊንቄ ጌቲቲስ። እዛካ ዩሱሲ ናይፔ ቱና አያና ኬሳና ማላ ዋሳዲስ።

27 ዩሱሲ ዛሪዲ እዚስ፡ «ናይታ ቁማ ኤኪ ካናሰ ዬጋናሰ ቤሶንታ ጊሻሰ ኮይሮ ናይቲ ሚ ካሌቶ» ጊዴስ።

28 እዛካ ዛሪዳ፡ «ኤ ጎዶ! ካናቲካ ማዳ ማታን ዴኢዲ ናይታ ኩሼፔ ጋዴን ዋዲዳይሳ ሜቲስ» ጋዲስ።

29 እዚካ፡ «ሂስቲኮ ኔኒ ሄሳ ጊዳ ጊሻሰ ባ! ዳይዳንላይ ኔ ናይፔ ከዚዴስ» ጊዴስ።

30 እዛ ሲማዳ ሶ ቢሺን ናያ ዳይዳንላይ ዬዲን ፓጳዳ ሂጸን ኢቺዳሮ ዴማዲስ።

#### ዩሱሲ ፓሊዳ ዶና ዲዴኔ ሃይላ ቱሌ አዴዛ

31 ሂሳፌ ዩሱሲ ጸረሴ ቢታፌ ዴንዲዲ ሲዶና ጌቲቲዛሶራ አዲ ታሙ ካታማ ጌቲቲዛሶራ ካንሊዲ ጌዴ ጋለላ አባኮ ጋኪዴስ።

32 አሳይ እሲ ሃይላ ቱሌኔ ዶና ዲዴ አሰ እዛኮ ሄ ኤኪ ዬዲ ዩሱሲ እዛ ቦላ ባ ኩሼ ዋላና ማላ ዋሲዳ።

33 ዩሱሲካ እዛ አሳፔ ሻኪ ኤኪ ቢዲ ባ ኩሼ ቢራዴታ አዴዛ ሃይላን ጌልሊዴስ፤ ቃሴካ ጩቕ ጩቲዲ አዴዛ ኢንጸርሰ ቦቺዴስ።

34 ፑዴ ሳሎ ጸሊዲኔ ቶኪ ሽምፒዲ፡ «ኤፍታ» ጊዴስ። ሄሲካ፡ «ፖጌታ» ጉሳ።

35 ሄራካ አዴዛ ሃይላቲ ፖጌቲዳ፤ ኢንጸርሳይካ ቢርሼቲን ጌሺ ሃሳይዴስ።

36 ዩሱሲ ሃይሳ ቤኢዳይቲ ኦናሰካ ዮቶንታ ማላ አዛዚዴስ፤ ጊዶ አቲን አሳይ እዚ አዛዚዛዳይሳፌ ቦላራ ከሄ ጉጂዲ ዮቲዴስ።

37 ዴሪዚካ ከሄ ማላሌቲዲ፡ «እዚ ኦሊዳይሲ ወሪ ሎኦ፤ ቱሌቲ ሲያና ማላ፤ ዶና ዲዴቲ ሃሳያና ማላ ኦሊዴስ» ጊዳ።

## 8

ዩሱሲ ኦይዱ ሺ እስ ሚዚዴስ

(ማቶ 15:32-39)

<sup>1</sup> ሄ ዋዴ ቃሴ ዳሮ እሲ ሺቂዴስ። ሺቂዴ እሳስ ሚዛ ካሊ ባይንዳ ጊሻስ ዩሱሲ ባና ካሊዛይታ ጸይጊዲ።

<sup>2</sup> «ሃይቲ አሳቲ ታናራ ሄሹ ጋላስ ጋካናስ ጋምኢዳ ጊሻሴ ቃሴካ ኢስታስ ሚዛ ካሊ ባይንዳ ጊሻስ ታና ሚቼቲስ።

<sup>3</sup> ኢስታፌ ኢሲ ኢሲ አሳቲ ሃሆፔ ዪዳ ጊሻስ ሃይሳ ጋፋራ ታ ኢስታ ሶ ዩዲኮ ዳቡርዲ ኦጌ ቦላ ኩንዳና» ጊዴስ።

<sup>4</sup> ኢዛ ካሊዛይቲካ ዛሪዲ። «ሃይሳ ባዞን ሃይሳ ማላ ዴሬ ሚዛና ቁማ አዋፔ ዴማኔ?» ጊዳ።

<sup>5</sup> ኢዚካ ኢስታ። «ኢንቴኮን አፑን ኡኬሊ ዲዜ?» ጊ ኦይቹዴስ። ኢስቲካ። «ላፑን ኡኬሊ ዴስ» ጊዳ።

<sup>6</sup> ኢዚካ አሳይ ጋዴን ኡታና ማላ አዛዚዴስ፤ ላፑን ኡኬላ ባ ኩሼን ኦይኪ ጋላቲዲኔ ሚንሊዲ አሳስ ጊሼቻና ማላ ባና ካሊዛይታስ አሚን ኢስቲካ ዴሬዛስ ጊሺዳ።

<sup>7</sup> ቃሴካ ሄን ዲዛ ቂሪ ጉላ ሞሌታ ጊሻስ ጸሳ ጋላቲዲ ጉላ ሞሌታ አሳስ ጊሼቻና ማላ ባና ካሊዛይታ አዛዚዴስ።

<sup>8</sup> ዴሬይካ ሚዲ ካሊዴስ። ሄሳፌካ ኢዛ ካሊዛይቲ ማዳፌ ፓላሂዳ ካስ ላፑን ሌማቴ ኩሚስ ዴንሊዳ።

<sup>9-10</sup> ሄሳ ሚዳ አሳይ ኦይዱ ሺ ጊዳና። ሄ አሳ ሞይዚዲ ባና ካሊዛይታራ ዋሳሎን ጌሊዲ ጌዴ ዳልማኑታ ጌቲቲዛሶ ቢዴስ።

<sup>11</sup> ፋርሳዌቲ ዪዲ ዩሱሳራ ፓላሚቲስ ኦይኪዳ፤ ኢዛ ፓጫናስ ኮዪዲ ባንታና ሳሎፔ ማላታ ቤሳና ማላ ኦይቹዳ።

<sup>12</sup> ኢዚካ ቶኪ ሼምፒዲ። «ሃይሲ ዩሌታዚ አዛስ ማላታ ኮይዜ? ታ ኢንቴስ ቱማ ጋይስ፤ ሃይሳ ዩሌታስ ኢሲ ማላታይካ ኢሜቲና» ጊዴስ።

<sup>13</sup> ኢስታ ሄን አጊዲኔ ዋሳሎን ጌሊዲ ሄ ፒንስ ፒኒዴስ።

ፋርሳዌታ ኢርሾኔ ሄርዶሳ ኢርሾ

(ማቶ 16:5-12)

<sup>14</sup> ኢዛ ካሊዛይቲ ካስ ኦይኮንታ ባሌቲዳ ጊሻስ ኢሲ ኡኬሊ አቲን ዋሳሎ ጊዶን ሃራ አይ ካሊካ ዴና።

<sup>15</sup> ዩሱሲ ኢስታ። «ፋርሳዌታ ኢርሾፌኔ ሄርዶሳ ኢርሾፌ ናጌቲቲ» ጊዲ አዛዚዴስ።

16 ኢስቲ ቃሴ ባ ጊደን ኢሶይ ኢሳራ፥ «ኢዚ ኑና ሃይሳ ጊዛይ ኑስ ካሊ ባይንዳ ጊሻሳ» ጊ ሃሳዬቲዳ።

17 ቃሴ ዩሱሲ ኢስታ ቆፋ ኤሪዳ፥ «ኑስ ካሊ ባይንዳ ጊሻሳ ጋሳ ጊዳ ኢንቲ ጊደን ኣዛሰ ሃሳዬቲቲ? ሃኢካ ዩሺ ቆፐኬቲ? ዋዚናንካ ዋሌኬቲ? ዋይኮ ኢንቲ ዋዚናይ ሹቻቲዳ?»

18 ኢንቲሰ ኣይፌይ ዳሰ ሺን ጸሌኬቲ? ሃይሊ ዳሰ ሺን ሲዩኬቲ? ኣኬኬኬቲ?

19 ኢቻሹ ኡኬሳ ኢቻሹ ሺ ኣሳሰ ታ ሜንላ ኢሚን ኣፑን ሌማቴ ኩሜላ ካል ዳንሊዳቲ?» ጊዳሰ።

ኢስቲካ ዛሪዳ፥ «ታማኔ ናምኡ» ጊዳ።

20 ኢዚካ፥ «ላፑን ኡኬሳ ኦይዱ ሺ ኣሳሰ ታ ሜንላ ኢሚን ኣፑን ሌማቴ ኩሜላ ካል ዳንሊዳቲ?» ጊ ኦይቺን ኢስቲካ፥ «ላፑን» ጊዳ።

21 ኢዚካ ኢስታሰ፥ «ሂስቲን ሃኢ ጋካናሰ ዩሺ ቆፐቤኬታካ!» ጊዳሰ።

**ዩሱሲ ቤቲሳይዳን ፓሊዳ ቆቄ ኣዳዛ**

22 ሄሳፌ ጌዳ ቤቲሳይዳ ጌቲቲዛሶ ቢዳ፤ ጉላ ኣሳቲካ ኣይፌ ቆቄ ኣሰ ዩሱሳኮ ኤሂዱ ዩሱሲ ኢዛ ቦቻና ማላ ዋሲዳ።

23 ኢዚካ ሄ ቆቄዛ ኩሹ ኦይኪ ጎቺዱ ኣሲ ዲዛሶፔ ጌዳ ካሬ ኬሲዱ ኣዳዛ ኣይፌን ጨቲዲኔ ባ ኩሹ ኢዛ ቦላ ዋሊዳ፥ «ሃኢ ኔስ ኣዚ ቤቲዜ?» ጊ ኦይቺዳሰ።

24 ኢዚካ ቆቄ ጊ ጸሊዳ፥ «ኣሳይ ሚል ሚሳቲዱ ቃጾቲሹ ቤቲስ» ጊዳሰ።

25 ቃሴካ ዩሱሲ ባ ኩሹታ ኢዛ ኣይፌታ ቦላ ዋሊዳሰ፤ ሄራካ ኢዛ ኣይፌቲ ጸሊዳ፤ ፖኦይካ ኢዛሰ ሲሚን ወርሲካ ጌሺ ጸሊዳሰ።

26 ቃሴ፥ «ሃ ጉታታ ጊዶ ጌሎፓኔ ኦናሰካ ዮቶፓ» ጊዱ ኢዛ ጌዳ ኢዛሶ ዩዲዳሰ። \*

**ዩሱሲ ጸሳፌ ኪቲቲዳዳ ጊዲዳይሳሰ ጳጽሮሳ ማርካቴል**  
(ማቶ 16:13-20፤ ሉቃ 9:18-21)

---

**8:18** ኤር 5:21፤ ሂዚ 12:2፤ ማር 4:12 \* **8:26** ጊኢዜ ጫቆ ኦራላ ማጻፋዚ 1,947 ማርቲላ ላይላን ጸፊቲዳ ኣማራላ ጊሻ ማጻፋዚኔ ኢሲ ኢሲ ቤኒ ጊሪኬ ቃሳን ጸፊቲዳ ጊሻ ማጻፋቲ ሃይሳፌ ካለዛ ቆፋ ጉጃቲስ፤ ሂስቲኮ ሃይሳ ኦናሰካ ዮቶፓ።

27 ዩሱሲ ባና ካሊዛይታራ ቁሳሪያ ፒሊጲሲዮሴ ጌቴቲዛ ዴሬ እቻን ዲዛ ጉታታ ቢዳስ፤ ኢስቲ ኦጌ ቦላ ዲሺን ባና ካሊዛይታ፡ «ታና አሳይ ኦና ጊዜ?» ጊዲ ኦይቺዳስ።

28 ኢስቲዛ ዛሪዲ ኔና፡ «ጸማቂዛ ዮሃኒሳ ጊዛይቲዛ ዴቴስ፡ ባጋይቲ ቃሴ ኤላሳ ጌቴስ፤ ሃራቲ ቃሴ ናቤታፔ አሳዴ ጌቴስ» ጊዲ ዮቲዳ።

29 ካሌሊዲካ፡ «ኢንቴቶ ታና ኦና ጌቲ?» ጊዲ ኦይቺዳስ። ጴጽሮስ፡ «ኔኒ ኪርስቶሳ» ጊዳስ።

30 ዩሱሲካ ባ ጊሻስ ኦናስካ ኢስቲ ዮቶንታ ማላ ሚንሊ ዮቲዳስ።

ዩሱሲ ባ ሃይቃናይሳ ካሴቲዲ ዮቲዳስ  
(ማቶ 16:21-28፤ ሉቃ 9:22-27)

31 ሄሳፌ ዩሱሲ ባና ካሊዛይታ፡ «አሳ ናይ ዳሮ ዋዩ ቤያናይሳኔ ዴሬ ጨማታን፡ ቄሴታ ሃላቃኒኔ ጸፊታን ካጼታና፤ አሳ ኩሼን ሃይቃና፡ ሃይቆፔ ሄዳንላ ጋላስ ዴንዳና ቤሴስ» ጊዲ ታማርሶ ኦይኪዳስ።

32 ኢዚካ ሄሳ ኢስታስ ቆንጨሲ ዮቲዳስ፡ ጴጽሮስካ ኢዛ ዲማ ሻኪ ኤፊዲ፡ «ሄሳላ ጎፓ!» ጊዲ ሃንቂዳስ።

33 ዩሱሲ ቃሴ ባና ካሊዛይታ ዩሺ ጸሊሼ ጴጽሮሳ፡ «ሃይሶ ጸላኤ ኔ ታፔ ጌዴ ጉዩ ባ! ኔኒ አሳዛፔ አቲን ጸሳዝ ቆፓካ!» ጊዲ ሃንቂዳስ።

34 ሄሳፌ ጉዩ አሳ ባና ካሊዛይታራ ኢሲፌ ባኮ ጴይጊዲ፡ «ታና ካላናስ ዶሲዛዴይ ዲኮ ባና ካዶ፤ ባ ማስቃሌ ቶኪዲ ታና ካሎ።

35 ባ ሼምፖ አሻና ዶሲዛዴይ ጳይሳና ሺን ታ ጊሻሲኔ ታ ሚሺራኝ ቃላ ጊሻስ ባ ሼምፖ ጳይሲዛዴይ ወሪካ አሻና።

36 አሲ አላሜ ኩሜል ሃሪኮኔ ባ ሼምፖ ጳይሲኮ ኢዛ አይ ጎኣኔ?

37 ዎይኮ አሲ ባ ሼምፖ ጊሻስ ላሜ ኤካናይ አዚ ዲዜ?

38 «ሃይሳ ላይማኔ ናጋራንቻ ዩሌታ ጊዶን ዲሼ ታናኒኔ ታ ቃላን ዩላቲዛ አሲ ወሪ ታ አሳ ናይ ታ አዋ ቦንቸራኔ ጌሻ ኪታንቻታራ ዪዛ ዎዴ ኢዛን ዩላታና» ጊዳስ።

## 9

1 ካሌሊዲካ ዬሱሲ «ታ ኢንቴስ ቱማ ጋይስ፤ ሃይሳን ኤቂዳ አሳፔ ጸሳ ካዎቴሊ ዋልቃራ ዩሺን ቤያና ጋካናስ ሃይቆንታ ጋሞኣና ኢሲ ኢሲ አሳቲ ዳቴስ» ጊዴስ።

## ዬሱሳ ሜዳ ላሜቴስ

2 ኡሱፑን ጋላሳፌ ጉዬ ዬሱሲ ጴጽሮሳ፣ ያቆቤኔ ዮሃኒሳ ባናራ ካሌሊ ኤኪዲ ኢሲ ጊታ ዙማ ቦላ ኬዚዴስ። ኢስቲ ባርካ ዲሺን ኢስታ ሲንፋን ኢዛ ሜዳይ ላሜቲ ዋዲዴስ።

3 ኢዚ ማይኢዳ ማይኦይ ቢታ ቦላ ኦኒካ ማይኦ ሜጪዲ ሃሳ ማላ ቦላናስ ዳንዳዮንታ ቦላ ቦቲዴስ።

4 ሄ ዋዴ ኤላሲኔ ሙሴይ ዬሱሳራ ሃሳዬቲሼ ኢስታስ ቤቲዳ።

5 ጴጽሮሲ ዬሱሳ፣ «ኢስታማሬ! ኦኒ ሃን ሃይሳን ዲዛኮ ኑስ ሎኦ፤ ኔስ ኢሲ ዳሴ፣ ሙሴስ ኢሲ ዳሴ፣ ቃሴ ኤላሳስ ኢሲ ዳሴ፣ ሄቹ ዳሴታ ኦ ኦሊኮቲ?» ጊዴስ።

6 ዳሮ ባቢዳ ጊሻስ ጴጽሮሲ ባ ጊዛይሳ ኤሪዲ ጊቤና።

7 ሄሪካ ሻሪይ ኢስታ ካሚን ሻራ ጊዶራ፣ «ሃይሲ ታ ዶሲዛ ታ ናዛኮ! ኢዚ ጊዛ ሲዩቴ» ጊዛ ቃላ ጊሪሲ ዩዴስ።

8 ሄሪካ ኢስቲ ዩሺ ጸለን ዬሱሳፔ ኣቲን ኦኒካ ሃራ ኣሲ ኢስታራ ዴና።

9 ኢስቲ ዙማ ቦላፌ ዲጌ ዋዲሺን ኣሳ ናይ ሃይቆፔ ዴንዳና ጋካናስ ሃይሳ ኢስቲ ቤኢዳይሳ ኦናስካ ዮቶንታ ማላ ኣዛዚዴስ።

10 ኢስቲካ ባሰ ዮቲዳ ቃላ ባ ዋዚናን ኦይኪዳ ሺን፣ «ሃይቆፔ ዴንዶ ጉሲ ኣይ ጉሴ?» ጊዲ ባ ጊዶን ሃሳዬቲዳ።

11 ቃሴ ኢስቲ ሙሴ ዋጋ ታማርሲዛይቲ፣ «ካሴቲዲ ኤላሲ ያና ኮሺስ ኣዛስ ጊዞ?» ጊዲ ኢዛ ኦይቺዳ።

12 ዬሱሲ ኢስታስ፣ «ቱሙካ ኤላሲ ካሴቲ ዩዲ ወርሲካ ጊጊሳና። ሂስቲንካ ኣሳ ናይ ዳሮ ዋዬ ኤካናሲኔ ካዴታናስ ቤሴስ ጌቲቲ ጸፊቲዳይሲ ኢንቴስ ኣይ ሚሳቲዜ?»

13 ጊዶ ኣቲን ታ ኢንቴስ ጊዛይ ኤላሲ ጊዲኮ ዩዴስ ሺን ኣሳይካ ኢዛ ጊሻስ ጸፊቲዳ ማላ ባና ኮሺዲ ማላ ኢዛ ቦላ ኦሊዴስ» ጊዴስ።

## ዬሱሲ ኢታ ኣያናፔ ፓሊዳ ናዛ

(ማቶ 17:14-20፤ ሉቃ 9:37-43)

14 ጌዶን አቲዳ ዬሱሳ ካሊዛይታኮ ኢስቲ ሲሚ ዩሺን ዳር አሳይ ኢስታ ጊዶሊን ሙሴ ዋጋ ታማርሲዛይቲ ኢስታራ ፓላሜቲዛይሳ ቤኢዳ።

15 ዳሬይ ኢዛ ዳሚዳ ማላ ማላሌቲዲ ሳርካናስ ኢዛኮ ዋጺዳስ።

16 ኢዚካ ኢስታ፥ «ኢንቴ ኢስታራ አዛ ጊሻስ ፓላሜቲ?» ጌዲ ኦይቺዳስ።

17 አሳ ጊዶፌ ኢሳዳይ፥ «አስታማሬ! ቱና አያናይ ኢዛን ጌሊን ዶና ዱዲዳ ታ ና ዳይሳ ታ ኔኮ ኤካ ያዲስ።

18 አያናዚ ዳንዲዛ ዋዴ ቦላፌ ዩጌስ፤ ዶናራ ጎፖንቶ ኬሲ ኬሲ ዩጌስ፤ አቻካ ጋርጮስ፤ አሳቴላካ ዞዲሴስ፤ ቱና አያና ኬሴቶ ጋዶ ኔና ካሊዛይታ ታ ዮቲን ኢስቲካ ዳንዳይቤቴና» ጌዴስ።

19 ዬሱሲካ ኢስታስ ዛሪዲ፥ «ኢንቴኖ አማኖንታ ዩሌታቶ፥ አይዴ ጋካናስ ታ ኢንቴናራ ዳኔ? ቃሴ አይዴ ጋካናስ ታ ኢንቴና ዳንዳያኔ? አኔ ናዛ ሃ ኤሂቴ» ጌዴስ።

20 አሳይካ ናዛ ኢዛኮ ኤሂዳስ፥ ቱና አያናይ ዬሱሳ ቤኢዳ ማላ ናዛ ሄራካ ጋዴን ጌንዴሪሲዲ ኮኮሪሲዲኔ ዶናራ ጎፖንቶ ጮፑ ሂስቲዳስ።

21 ዬሱሲ ናዛ አዋ፥ «ሃይሲ ሃርጌይ ኢዛ አዩዳሳፔ ኦይኪዳ?» ጌዴስ። ናዛ አዋይካ፥ «ናቴላፌ ዶሚዲ» ጌዴስ።

22 «ኢዛ ዋቆናስ ኮዪዲ ዳር ዋዴ ታማንካ ሃላንካ ዩጌስ። ኔስ ዳንዳዬቲኮ ኦስ ሚሺታኔ ኦና ማዳ» ጌዴስ።

23 ዬሱሲ ቃሴ፥ «ኔስ ዳንዳዬቲኮ» ጋይ? አማኒዛዴስ ዉሪካ ዳንዳዬቲስ» ጌዴስ።

24 ናዛ አዋይ ሄራካ፥ «ታ አማናይስ ሺን ታ አማኖይ ላፋ፥ ታና ማዳርኪ!» ጌዲ ዋሲዳስ።

25 አሳይ ዋጮሚሺ ቡሬቲ ኤኪዲ ኢዛኮ ዩዛይሳ ዬሱሲ ቤኢዲ፥ «ሃይሶ ቱሌኔ ዱዴ አያናዙ! ሃይሳ ናዛፔ ኬዛ፥ ኔ ቃሴ ሲማዳ ጌሎንታ ማላ ታ ኔና አዛዛይስ» ጌዲ ቱና አያና ሴሪዳስ።

26 ቱና አያናዚካ ኬሂ ዋሲዳስ፤ ናዚካ ኬሂ ቃኬቲዳፔ ጉዬ ናዛፔ ኬዚዳስ። ዳርቲ ሃይቂዳስ ጋና ጋካናስ ናዚ አሃ ሚሳቲዳስ።

27 ጊዶ አቲን ዬሱሲ ናዛ ኩሼ ኦይኪ ዳንፊዳስ፤ ናዚካ ዳንዲ ኤቂዳስ።

28 ዬሱሲ ሶ ጌሊዳፔ ጉዬ ኢዛ ካሊዛይቲ፥ «ኦ ኢዛፔ ቱና አያና ኬሳናስ አዛስ ዳንዳይቤኮኒ?» ጌዲ ኢዛ ኦይቺዳ።

29 ኢዚካ ኢስታስ፥ «ሃይሳ ማላይ ኬዛና ዳንዳይዛይ ዋሳኒኔ ጸማን ጳላ» ጌዴስ።

ዩሱሲ ባ ሃይቆ ገሻሲኔ ባ ዳንዶ ገሻሰ ቃሴካ ዮቲዴሰ  
(ማቶ 17:22-23፤ ሉቃ 9:43-45)

30 ሄፔ ዴንዲዲ ጋለላ ባጋራ አዲ ቢዳ፤ ዩሱሲ ባ ዲዛሶ ኦኒካ ኤራና ማላ ኮዪቤና።

31 ጋሶይካ ዩሱሲ ባና ካሊዛይታሰ፤ «አሳ ናይ አሳ ኩሼን አዲ ኢሜታና፤ ኢሰቲካ ኢዛ ዋቆና፤ ሄሻንሶ ጋላሳፊ ጉዬ ኢዚ ዴንዳና» ጊዲ ኢሰታ ታማርሲዛ ገሻሳ።

32 ጊዶ አቲን ኢዚ ገዛይሲ ኢሰታሰ ጌሊቤና፤ ኢዛ ኦይቻናሰካ ባቢዳ።

ኡባፌ አዲዛይ ኦኔ?

(ማቶ 18:1-5፤ ሉቃ 9:46-48)

33 ሄሳፌ ጉዬ ቂፊርናሆሜ ቢዳ፤ ኢዚ ኬፌ ጌሊዲ፤ «ኢንቴ ዪሼ ኦጌ ቦላ አዛ ገሻሰ ፓላሜቲዴቲ?» ጊ ኦይቺዴሰ።

34 ኢሰቲ ቃሴ ኦጌ ቦላ፤ «ኦ ጊዶን ኦፔ ኡባፌ አዲዛይ ኦኔ?» ጊዲ ፓላሜቲዳ ገሻሰ ዉሪካ ጮኡ ጊዳ።

35 ኢዚ ኡቲዳፔ ጉዬ ታማኔ ናሞአታ ጴይጊዲ፤ «ኮይሮ ጊዳና ኮይዛዴይ ኡባፌ ዉርሴሊኔ ኡባታሰ አሸካራ ጊዶ» ጊዴሰ።

36 ቂ ጉላ ና ኤሂዲ ኢሰታ ጊዶን ኤሲዴሰ። ኢዲሚዲ፤

37 «ሃይታ ጉላ ናይታፔ ኢሳዴ ታ ሱንላን ሞኪ ኤኪዛዴይ ታናካ ሞኪ ኤኬሰ፤ ታና ሞኪ ኤኪዛዴይ ዉሪ ታና ጸላላ ጊዶንታ ታና ከቲዳይሳካ ሞኪ ኤኬሰ» ጊዴሰ።

ኦና ኢጸንታይ ዉሪ ኦ ባጋ

(ሉቃ 9:49-50)

38 ዮሃኒሲካ፤ «ኢሰታማሬ! ኢሳዴይ ኔ ሱንላን ዳይዳንሐ ኬሲሺን ኦ ቤይዶሰ። ኢዚ ኦና ካሎንታ ገሻሰ ኬሶንታ ማላ ዲጊዶሰ» ጊዴሰ።

39 ዩሱሲ ቃሴ፤ «ዲጎፍቲ፤ ኦኒካ ታ ሱንላን ማላታ ኦሊዲ ኤሶቲዲ ታ ቦላ ኢታ ሃሳያናሰ ዳንዳዬና።

40 ኦናራ ኤቁቶንታይ ዉሪ ኦናራ ዴሰ።

41 ታ ኢንቴሰ ቱሙ ጋይሰ፤ ኢንቴ ቲዬቲዳ ኪርሰቶሳሰ ጊዲዳ ገሻሰ ታ ሱንላን ኢሲ ዋንጫ ሃሐ ኢንቴና ኡሺዳዴይ ዉሪ ባ ኦሶይሰ ዋጋ ዳዬና።

9:34 ሉቃ 22:24      9:35 ማቶ 20:26-27፤ 23:11፤ ማር 10:43-44፤ ሉቃ 22:26      9:37 ማቶ 10:40፤ ሉቃ 10:16፤ ዮሃ 13:20      9:40 ማቶ 12:30፤ ሉቃ 11:23      9:41 ማቶ 10:42

አሳሰ ጱጴ ጊዳናፔ ናጌቴል  
(ማቶ 18:6-9፤ ሉቃ 17:1-2)

42 «ሃይታ ታና አማኒዛ ሃ ጉላታፔ አሳዴሰ ጱጴ ጊዳዛይ ወሪ ዴጾ ዋጸ ሹቺ ኢዛ ቆጴን ቃሼቲን ዱጌ አባ ጊዶ ኦሌቲዳኮ ኢዛሰ ሎኦ ጊዳና።

43 ሄሳ ጊሻሰ ኔ ኩሼይ ኔና ባሌሊኮ ኔፔ ቃንጸ ዩጋ፤ ናምኡ ኩሼራ ዳዳ ጌዴ ጋናሜ ታማን ኔ ባናይሳፌ ኩሼ ዱጸ ጊዳዳ ጌዴ ዴኦን ጌሎይ ኔሰ ሎኦ ጊዳና።

44 ጋናሜን ጉጹኔይ ሃይቁና፥ ታማይኔ ቶኤና። \*

45 ኔና ኔ ቶሆይ ባሌሊኮ ኔፔ ቃንጸ ዲጋ፤ ናምኡ ቶሆራ ዳዳ ጌዴ ጋናሜ ታማን ዩጌታናፔ ኔ ዋቤ ጊዳዳ ጌዴ ዴኦሶ ጌሎይ ኔሰ ሎኦ።

46 ጋናሜን ጉጹኔይ ሃይቁና፥ ታማይኔ ቶኤና።

47 ኔና ኔ አይፌይ ባሌሊኮ ዋጫ ኬሳዳ ኔፔ ዲጋ፤ ናምኡ አይፌራ ዳዳ ጌዴ ጋናሜን ዩጌታናፔ ኢሲ አይፌራ ጸሳ ካዋቴል ጌሎይ ኔሰ ሎኦ።

48 ጋናሜን ጉጹኔይ ሃይቁና ታማይኔ ቶኤና።

49 «ቡሮ አሲ ወሪ ታማን ፓጩታና።

50 «ማጺኔይ ሎኦ፤ ጊዶ አቲን ማጺኔይ ባ ማጺኔቴላ ዩዲኮ ኢንቴ ዋሰቲ ኢዛ ማልኦ ኤራኔ? ኢንቴ አሳቴላን ማጺኔይ ዴኦ። ኢንቴ ኢንቴ ጊዶን ዶሴቲቴ» ጊዴሰ።

## 10

ማቾ አንጂ ዩዳናሰ ቤሴና  
(ማቶ 19:1-12፤ ሉቃ 16:18)

1 ዩሱሲ ሄፔ ዴንዲዲ ጌዴ የሁዳ ጌቲቲዛ ዴሬኔ ዮርዳኖሴ ሻፋፔ ፒንሳን ዲዛ ዴሬ ቢዴሰ። ዴሬይካ ቃሴ ኢዛ ዩዩ አፂን ኢዚ ካሴ ባ ኦሊዛ ማላ አሳ ታማርሲዴሰ።

2 ኢሲ ኢሲ ፋርሳዌቲ ኢዛኮ ዩዲ፥ «አሲ ባ ማቾ አንጂ ዩዳናሰ ቤሴዜ?» ጊዲ ኢዛ ፓጩ ኦይሾ ኦይቺዳ።

3 ኢዚካ ኢሰታሰ፥ «ሙሴይ ኢንቴና አይ ጌ አዛዚዴ?» ጊዲ ዛሪ ኦይቺዴሰ።

9:43 ማቶ 5:30 \* 9:44 ኢሲ ኢሲ ጌሻ ማጸፋቲ ታይቦ 44ኔ 46 ቦላ ዲዛ ቆፋ ጉጃቲስ፤ ቆፋዚካ ታይቦ 48 ቦላ ዲዛይሳ ሚሳቲስ። 9:47 ማቶ 5:29

9:48 ኢሳ 66:24 9:50 ማቶ 5:13፤ ሉቃ 14:34-35

4 ኢስቲካ ኢዛስ፡ «ሙሴይ ታ ኢዛ ኣንጃ ዩዳዲስ ጊዛ ዋራቃታ ጻፊ ኢሚዲ ኣንጃ ጊዴስ» ጊዳ።

5 ዩሱሲካ ዛሪዲ ኢስታ፡ «ሙሴይ ሃይሳ ማላ ዋጋ ጻፊዲሲ ኢንቴ ዋዚናይ ሚኒዳ ጊሻሳ።

6 ጊዶ ኣቲን ኮይሮ ጸሲ ሜጲሼ ማጫኔ ኣዴ ኦሊ ሜጲዴስ።

7 ሄሳ ጊሻስ ኣሲ ባ ኣዋኔ ባ ኣዮ ኣጊዲ ባ ማቺራ ዋጼቴስ።

8 ናምኣይ ኢሲ ኣሾ ጊዴቴስ፤ ሄሳ ጊሻስ ኢስቲ ናምኣይ ኢሲኖፕ ኣቲን ናምኡ ዴቴና።

9 ሄሳ ጊሻስ ጸሲ ጋሊ ዋጲዳይታ ኣሲ ሻኮፎ» ጊዴስ።

10 ቃሴካ ኢስቲ ሶ ጌሊን ኢዛ ካሊዛይቲ ሄ ዮኦዛ ጊሻስ ዛሪ ኢዛ ኦይቺዳ።

11 ኢዚ ኢስታስ፡ «ኦኒካ ባ ማቾ ኣንጃ ዩዲዲ ሃራ ማጫስ ኤኪኮ ሄ ማጫሳይ ቦላ ላይማ ኦፊስ።

12 ማጫሳያካ ባ ኣዚና ኣጋዳ ሃራ ኣዴ ጌሊኮ ኢዛካ ላይማታዉስ» ጊዴስ።

**ዩሱሲ ጉላ ናይታ ኣንጂዴስ**

**(ማቶ 19:13-15፤ ሉቃ 18:15-17)**

13 ዩሱሲ ባ ኩሼ ዋላና ማላ ኣሳይ ናይታ ኢዛኮ ኤሂዴስ። ኢዛ ካሊዛይቲ ቃሴ ኤሂዳ ኣሳ ቦላ ሃንቄቲዳ።

14 ዩሱሲ ሄሳ ቤዪ ሃንቄቲዲ፡ «ናይቲ ታኮ ዩቶ፤ ዲሳፍቴ፤ ጸሳ ካዎቴሊ ሃይታንታ ማላሳ።

15 ታ ኢንቴስ ቱሙ ጋይስ፤ ጸሳ ካዎቴሊ ሃይሳ ጉላ ናይታ ማላ ኤኮንታዴይ ኢዚን ሙሌካ ጌሌና» ጊዴስ።

16 ናይታ ኢዲሚዲ ኢስታ ቦላ ባ ኩሼ ዋሊዲ ኣንጂዴስ።

**ኢሲ ዱሬ ኣዴ**

**(ማቶ 19:16-30፤ ሉቃ 18:18-30)**

17 ሄፕ ቡሮ ኦጌ ኬዚሺን ኢሳዴይ ዋጲሼ ኢዛኮ ጋኪዲኔ ኢዛ ሲንላን ጉልባቲዲ፡ «ኪያ ኣስታማሬንቶ! ታኒ ሜርና ዴኦ ዴማና ማላ ኣይ ኦላና ታስ ቤሲዜ?» ጊ ኦይቺዴስ።

18 ዩሱሲካ፡ «ኣዛስ ታና ኪያ ጋይ? ኢሲ ጸሳፌ ኣቲን ኪያይ ባ» ጊዴስ።

19 «ኔኒ አዛዙታ ኤራይ? «ዋጁ፣ ላይማቶ፣ ካይሶቶ፣ ዋርዶ ማርካቶ፣ አስ ባሌላ፣ ኔ አዋኔ ኔ አዮ ቦንቻ» ገዛይታ» ገዴሰ።

20 አዴዚካ ዛሪዲ፡ «አስታማሬ! ታ ሃይታ ወርሳ ናቴላፊ ኦይካዳ ናጋዲሰ» ገዴሰ።

21 ዩሱሲ ኢዛ ጸሊዲኔ ዶሲዲ፡ «ሂስቲኮ ሃኢ ኔስ ኢሲ ሚሽ ፓጩሰ። ባዳኔ ኔስ ዲዛ ወርሳ ባይዛ፤ ሚሻ ማንቆታስ አማ፤ ኔኒ ሳሎን ሺቂዳ ሚሽ ዴማንዳሳ፤ ሂስታዳኔ ሃ ያዳ ታና ካላ» ገዴሰ።

22 አዴዚካ ሄሳ ሲዬዲ ዳሮ ዬሎቲዴሰ፤ ኢዛስ ዳሮ አቆታይ ዲዛ ገሻሰ ሙዞቲሼ ቢዴሰ።

23 ዩሱሲ ዩሼ አሏ ጸሊዲ ባና ካሊዛይታ፡ «ዱሬታስ ጸሳ ካዋቴላ ጌሎይ አይ ማላ ዴጸ!» ገዴሰ።

24 ኢዛ ካሊዛይቲካ ኢዛ ሃሳያን ማላሌቲዳ፤ ዩሱሲ ቃሴ ዛሪዲ፡ «ናይቶ! ጸሳ ካዋቴላ ጌሎይ አይ ማላ ዴጸ ሚሼ!

25 ዱሬይ ጸሳ ካዋቴላ ጌላናይሳፊ ጋሜላይ ናርፔ ሉኮራ አቆናይሲ ካወያና!» ገዴሰ።

26 ኢዛ ካሊዛይቲካ ዳርሲ ማላሌቲዲ ባ ገዶን ኢሶይ አሳ፡ «ሂስቲን ኦኒ አታና ዳንዳይዜ?» ገዴሰ።

27 ዩሱሲ ኢስታ ጸሊዲ፡ «ሃይሲ አሳስ ዳንዳይቲና፤ ጸሳ ማታን ገዲኮ ሄሳ ማላ ገዴና። ጸሳስ ወሪካ ዳንዳይቲስ» ገዴሰ።

28 ጴጽሮሲ ቃሴ፡ «ሄኮ፤ ኦኒ ወርሲካ አገዲ ኔና ካሊዶስ» ገዴሰ።

29 ዩሱሲካ ዛሪዲ፡ «ታ ኢንቴስ ቱሙ ጋይስ፤ ታ ገሻሲኔ ሚሺራች ቃላ ገሻሰ ገዲ ባ ኬሏ፡ ዋይኮ ባ አሻታ፡ ዋይኮ ባ ሚቹታ፡ ዋይኮ ባ አዮ፡ ዋይኮ ባ አዋ፡ ባ ናይታ፡ ዋይኮ ባ ጋዴ አገዳ አሲ ወሪ፡

30 ሃይሳ ሃ ዋዴዛን ሃኢ ጎዴቴላራ ኬላታ፡ አሻታ፡ ሚቹታ፡ አይታ፡ ናይታኔ ጋዴካ ጸቱ ኩሼ አሏ ኤኮንታይኔ ቡሮ ያና አላሜዛንካ ሜርና ዴኦ ላቶንታዴይ ዴና።

31 ገዶ ኦቲን ሲንላቲዳ ዳሮቲ ጉዬታና፤ ጉዬቲዳይቲ ሲንላታና» ገዴሰ።

**ዩሱሲ ባ ሃይቂ ዴንዳናይሳ ሂሻንሶ ዮቲዴስ**

32 ኢስቲ ዩሩሳላሜ ኤፊዛ ኦጌ ቦላ ዲሺን ዩሱሲ ኢስታፊ ሲንሏ ሲንሏ ቤሰ። ኢዛ ካሊዛይቲ ኢዛ ቡሳን ማላሌቲዳ። ሃንኮ

ኢዛ ጋሶን ዲዛ አሳይ ቃሴ ኢዛሰ ባቢዴሰ፤ ቃሴካ ታማኔ ናምኦታ ዴሬዛፔ ዱማ ሻኪዲ ባ ቦላ ኣዚ ጋካናኮን ኢሰታሰ ሂዝጊ ዮቲዴሰ፤

<sup>33</sup> «ኮኒ ዬሩሳሌም ኬዛና፤ አሳ ናይ ቄሴታ ሃላቃታሲኔ ሙሴ ዋጋ ታማርሲዛይታሰ ኣጂ ኢማታና፤ ኢሰቲካ ኢዛ ቦላ ሃይቆ ፒርዳ ፒርዳናኔ ዴሬ አሳሰ ኣሉ ኢማና።

<sup>34</sup> ኢዛ ቦላ ቁጂ ካኣና፤ ኢዛ ቦላ ጩታና፤ ኢዛካ ጋራፋናኔ ዋጃናሺን ኢዚ ሄዙ ጋላሳፌ ጉዬ ሃይቆፔ ዴንዳና።»

### ያቆቤይኔ ዮሃንሲ ዋሲዳ ዋሳ

(ማቶ 20:20-28)

<sup>35</sup> ቃሴ ዛብዶሳ ናይቲ ያቆቤይኔ ዮሃንሲ ኢዛኮ ሸቂዲ፥ «ኣሰታማሬ! ኮኒ ኔና ዋሲዳይሳ ኔ ኮሰ ዉርሳ ኦላና ማላ ኦ ኮዮሰ» ጊዳ።

<sup>36</sup> ኢዚካ ኢሰታሰ፥ «ታ ኢንቴሰ ኣይ ኦላና ማላ ኮዬቲ?» ጊዴሰ።

<sup>37</sup> ኢሰቲካ፥ «ኔኒ ኔ ካዎቴላ ቦንቸን ዲዛ ዋዴ ኦፔ ኢሳዴይ ኔ ኡሻቻን፥ ኢሳዴይ ኔ ሃዲርሳን ኡታና ማላ ኦሰ ኤሮ ጋርኪ?» ጊዳ።

<sup>38</sup> ዬሱሲካ፥ «ኢንቴ ኦይቸዛይሳ ኤሬኬታ፤ ታኒ ኡያና ኡሻ ኡያናሲኔ ታኒ ጸማቂቲዛ ጸንቃታ ኢንቴ ጸማቂታናሰ ዳንዳያንዴቲ?» ጊዴሰ።

<sup>39</sup> ኢሰቲካ ዛሪዲ፥ «ኤ፥ ዳንዳዮሰ» ጊዳ። ዬሱሲካ፥ «ታ ኡዩዛ ኡሻ ኢንቴ ኡያናኔ ታ ጸማቂቲዛ ጸንቃታ ኢንቴ ጸማቂታና።

<sup>40</sup> ጊዶ ኣቲን ታ ኡሻቻራ ዋይኮ ታ ሃዲርሳራ ኡቴሉ ጸሲ ኢሰታሰ ገግሲዳይታሰ ኣቲን ታ ኢማና ሚሽ ጊዴና» ጊዴሰ።

<sup>41</sup> ታማቲ ሄሳ ሲዩዲ ያቆቤይኔ ዮሃንሳ ቦላ ሃንቂቲዳ።

<sup>42</sup> ዬሱሲካ ኢሰታ ኢሲ ቦላ ሺሺዲ፥ «ዴሬ ሃላቃ ጌቴቲዛይቲ ዴሬ ሃሪዛይሳ ማላ ኢሰታ ሹማቲ ኢሰታ ቦላ ባ ጎዳቴሉ ቤሲዛይሳ ኢንቴ ኤሬታ።

<sup>43</sup> ጊዶ ኣቲን ኢንቴ ጊዶን ጊታ ጊዳና ኮይዛ ኡባይ ኣሸካራ ጊዶ።

<sup>44</sup> ሲንፌ ኣቆና ኮይዛይ ዉሪካ ኡባሰ ኣይሌ ጊዶ።

<sup>45</sup> አሳ ናይ ጊዲኮ አሳሰ ኦላናሲኔ ባ ሸምፖ ዳርታ ጊሻሰ ኣሉ ኢማናሰ ዩዴሰ ኣቲን ኣሴ ኦሲሳናሰ ዩቤና» ጊዴሰ።

ባርዶሞሳ አይፌ ፓጽቴስ

(ማቶ 20:29-34፤ ሉቃ 18:35-43)

46 ሄፔ ጌዳ ኢያርኮ ቢዳ፤ ዩሱሲኔ ኢዛ ካሊዛይቲ ሃራ ዳሮ አሳታራ ኢያርኮፌ ኬዚሽን ጸሞሳ ና ባርዶሞሳ ጌቴቲዛ አይፌ ቆቄይ ኦጌ ቦላ ኡቲዲ ዋሴስ።

47 ኢዚካ ዩዛይ ናዚሬቴ ዩሱሳ ጊዲዳይሳ ሲዩዲ፡ «ዳዊቱ ና ዩሱሳ ታና ማራ» ጊዲ ኬሂ ዋሲዴስ።

48 ዳሮቲ ኢዚ ጮኡ ጋና ማላ ሃንቂዳ፤ ጊዶ አቲን ኢዚ፡ «ዳዊቱ ናወ! ታና ማራ» ጊዲ ኬሂ ዋሲዴስ።

49 ዩሱሲካ ኤቂዲ፡ «ኢዛ ሃ ጳይጌጌቴ» ጊዴስ። ኢሰቲካ ቆቄዛ፡ «አይኮይ ባ ዴንዳ ኔና ጳይጌጌስ» ጊዴ።

50 ኢዚካ ባ ማይኦ ቃሪ ዩጊዲ ፑሱኩ ጊ ዴንዲ ኤቂዲ ዩሱሳኮ ዩዴስ።

51 ዩሱሲካ፡ «ታ ኔስ አይ ኦፋና ማላ ኮያይ?» ጊዴስ። ቆቄዚካ፡ «አስታማሬንቶ! ታ ጸላና ኮያይስ» ጊዴስ።

52 ዩሱሲካ ዛሪዲ፡ «ባ ኔና ኔ አማኖይ ፓሒዴስ» ጊዴስ። ሄራካ ኢዛ አይፌይ ጸሊዴስ። ኢዚካ ዩሱሳ ካሊ ቢዴስ።

## 11

ጌታ ቦንቾራ ዩሱሲ ዩሩሳላሜ ቡስ

(ማቶ 21:1-11፤ ሉቃ 19:28-40፤ ዮሃ 12:12-19)

1 ኢስቲ ጌዳ ዩሩሳላሜን ዳብራዛይቲ ጌቴቲዛ ዙማ አቻን ዲዛ ቤቴፋጌኔ ቢታኒያ ጌቴቲዛሶ ማቲዳ ዎዴ ዩሱሲ ባና ካሊዛይታፔ ናምኣታ፡

2 «ጌዳ ኢንቴ ሲንፋን ዲዛ ጉታዮ ቢቴ። ኢንቴ ሄ ጌሊዳ ማላ ሄን አሲ ቶጊ ኤሮንታ ቃሾን ዲዛ ሃሬ ጉቴ ኢንቴ ዴማና፤ ቢርሺዲ ኢዛ ሃ ኤኪ ዩቴ።

3 ኦጊካ ኢንቴና፡ «ሃይሳ አይስ ኦፊቲ?» ጊኮ ኅዳስ ኮሼስ ጊዲ ዮቴቲ፤ ኢዚካ ኢንቴስ ኤሶን ዛሪ ዩዳና» ጊ ኪቲዴስ።

4 ኢስቲካ ቢዲ ኢሲ ኬፋ ካሬን ኦጌ ቦላ ቃሼቲ ዲዛ ሃሬ ጉቴ ዴማዲ ቢርሺዲ።

5 ሄን ኤቂዳ ኢሲ ኢሲ አሳቲ፡ «ሃሬ ጉቴዛ አዛስ ቢርሺቲ?» ጊ ኦይቺዳ።

6 ዩሱሳ ካሊዛይቲ ዩሱሲ ኢሰታስ ጊዳ ማላ አሳታስ ዮቲን ኤሮ ኤኪ ቢቴ ጊዴ።

7 ጉቴዛካ ዩሱሳኮ ኤሂዲ ባ ማይኦ ኢዛ ዞኮ ቦላ ዩጊን ዩሱሲ ኢዛ ቶጊዴስ።

8 ዳር አሳይ ባ ማይኦ ኬሲ ኬሲ ኦጌ ቦላ ሚጨዳሰ። ባጋ አሳይ ጨሊላ ሚላ ሃይላ ቃንጺ ቃንጺዲ ኦጌ ቦላ ላሊዳሰ።

9 ዩሱሳፔ ሲንሳራኔ ጉዬራ ዲዛ አሳይ ቃላ ቶቁ ሂስቲዲ፥  
«ሆሳኢና፤ ጎዳ ሱንሳን  
ዪዛዳይ አንጃቲዲዳ።

10 ሃና ዪዛራ ኑ አዋ  
ዳዊቱ ካዎቱላያ  
አንጃቲዳር፤  
ሆሳኢና! ቦላ ሳሎን  
ጸሲ ቦንቹቶ»  
ጊሼ ዋሲዳሰ።

11 ዩሱሲ ዩሩሳላሚ ጋኪዲ ሄሳፌካ ጸሳ ኬሌ ጌሊዳሰ። ሄ ሄራን ዲዛይሳ ኡባ ዴሊዲ ጋዴይ ቃሚዳ ጊሻሰ ታማኔ ናምኣታራ ጌዴ ቢታኒያ ኬዚዳሰ።

ዩሱሲ ቃንጊዳ ባላሴ ሚላዮ  
(ማቶ 21:18-19)

12 ዋንቱላ ጋላሰ ኢስቲ ቢታኒያፔ ኬዚ ቢሺን ዩሱሲ ጋፊዳሰ።

13 ኢዚ ኢሲ ሃይላ ጨሊሊዳ ባላሴ ጌቱቲዛ ሚላ ሃሆን ቤኢዲ አይፌይ ዳናኮን ጊዲ ኢዚኮ ዪዳሰ። ጊዶ ኣቲን ባላሴ ሚላ አይፎንታ ዋዴ ጊዲዳ ጊሻሰ ሃይላፌ ኣቲን ኢሲ አይፊካ ኢዚፔ ዴሚቤና።

14 ሄሳ ጊሻሰ ሚላዮ፥ «ሃኒፌ ጉዬ ሚርናሰ ኦኒካ ኔፔ አይፌ ዋፖ!» ጊዳሰ። ኢዛ ካሊዛይቲካ ኢዚ ጊዛይሳ ሲዪዳ።

15 ጌዴ ዩሩሳላሚ ቢዳ፤ ሄፔካ ጸሳ ኬሌ ጌሊዲ ሄን ባይዚዛይታኔ ሻሚዛይታ ኬሲ ጎዶ ኦይኪዳሰ። ሚሼ ላሚዛይታ ጸራጴዛኔ ሃራጴ ባይዚዛይታ ኦይዴ ጉፋንላ ጉፋንላ ዩጊዳሰ።

16 ኦኒካ አይ ሚሽ ቶኪዲ ጸሳ ኬላ ጊቤ ጊዶራ ኣቶንታ ማላ ዲጊዳሰ።

17 ኢስታካ ታማርሲሼ፥ «ታ ኬላ ዴሬ ኡባሰ ዋሳ ኬሌ ጊዳና ጌቱቲ ጸፊቲቤኔ? ጊዶ ኣቲን ኢንቱ ካይሶታ ጎንጎሎ ኬሲዳታ» ጊዳሰ።

18 ቄሴታ ሃላቃቲኔ ሙሴ ዋጋ ታማርሲዛይቲ ሄሳ ሲዪዲ ኢዛ ዋስቲ ቆይሳናኮን ኦጌ ኮሽ ኦይኪዳ። ጊዶ ኣቲን ዴሬይካ ኢዛ ቲሚርቲዛን ማላሌቲዳ ጊሻሰ ኢዛሰ ባቢዳ።

19 ኢስቲካ ጋዴይ ቃሚን ካታማይፔ ኬዚ ቢዳ።

20 ዋንቴላ ጋላስ ማላዶ ኢስቲ ኦጌራ አፏ ቢሸን ባላሴ ሚላያ ጸጸፔ ሜሊዳሮ ቤኢዳ።

21 ዮኦዚ ኢዛ ዋዚናን አኬኬቲን ጴጽሮሲ ዬሱሳ፡ «አስታማሬ! ሄኮ፡ ሃና ኔ ቃንጊዳ ባላሴያ ማላዶስ» ጊዴስ።

22 ኢዚካ ዛሪዲ፡ «ጸሳ አማኒቲ።

23 ታ ኢንቴስ ቱሙ ጋይሰ፤ ሐኒካ ሃይሳ ዙማዛ ኔ ቋቃሌታዳ አባን ጌላን ጊዛኮ ሄሳካ ዋዚናን ሲጽንታ አማኒዳኮ ኢዛዴስ ሃናና።

24 ሄሳ ጊሻስ ኢንቴ ዋሳን ኦይቺዳዝ ኡባ ኤቢዳ ማላ አማኒኮ ኢንቴስ ሃናና።

25 ሄሳሶካ ኢንቴ ዋሳስ ኤቂዛ ዋዴ ኢንቴ ሳሎ አዋይ ኢንቴ ናጋራ አቶ ጋና ማላ ኢንቴካ ኢንቴና ቆሂዳይታ ናጋራ ኡባ አቶ ጌቲ።

26 ኢንቴ አቶ ጎንታ ኢዲኮ ኢንቴ ሳሎ አዋይካ ኢንቴ ናጋራ አቶ ጌና» ጊዴስ። \*

27 ቃሴካ ዬሩሳላሜ ዪዳ፤ ዬሱሲ ጸሳ ኬላ ካሬ ጊዶን ያኔ ሃ ዩዬቲሸን ቄሴታ ሃላቃቲ፡ ሙሴ ዋጋ ታማርሲዛይቲኔ ዴሬ ጨማቲ ኢዛኮ ሸቂዲ፡

28 «ሃይሳ ኔ ኦሲዛይ አይ ጎዳቴላራ? ሃይታ ኔ ኦላና ማላ ሃይሳ ማላ ጎዳቴላ ኔስ ኦኒ አሚዴ?» ጊዳ።

29 ዬሱሲካ ኢስታስ ዛሪዲ፡ «አኔ ታኒካ ኢንቴና ኢሲ ኦይሾ ኦይቻይሰ፤ ኢንቴካ ታስ ዛሪኮ ታኒካ ሃ ዮኦታ አይ ጎዳቴላራ ኦሲዛኮ ኢንቴስ ዮታና።

30 ዮሃኒሳ ጸንቃታይ ጸሳፌዬ? አሳፔ? አኔ ታስ ዛሪቴ» ጊዴስ።

31 ኢስቲካ ባ ጊዶን ኢሶይ ኢሳራ፡ «ኦ ሳሎፔ ጊኮ ኢዚ ኦና፡ «ሂስቲኮ አዛስ ኢዛ አማኒቤኬቲ?» ጋና፤

32 ሐኦ አሳፔ ጊኮ» ዮሃኒሲ ቱሙ ናቤ ጊዲዳይሳ ዴሬይ ዉሪ አማኒዛ ጊሻስ ሄሳሶ ጋና ባቢዳ።

33 ሄሳ ጊሻስ፡ «ኦ ኤሮኮ» ጊዲ ዬሱሳስ ዛሪዳ። ዬሱሲካ፡ «ሂስቲኮ ታ ሃይታ አዛ ጎዳቴላራ ኦሲዛኮ ታኒካ ኢንቴስ ዮቲኬ» ጊዴስ።

---

11:23 ማቶ 17:20፤ 1ቆሮ 13:2 \* 11:26 ኢሲ ኢሲ ጌሻ ማጻፋቲ ታይቦ 26 ቦላ ዲዛ ቆፋ ጉጃቴስ። 11:26 ማቶ 6:14-15

# 12

ዎይኔ ሚላ ቶኪዛ ጎሻ አሳታ ሌሚሶ

(ማቶ 21:33-46፤ ሉቃ 20:9-19)

<sup>1</sup> ቃሴ ኢስታስ ሌሚሶራ ዮቲሼ፥ «ኢሳይይ ባ ዎይኔ ሚላ ቶኪዴስ። ኬላ ዩሺ ኣሉ ኬሊዴስ፤ ዎይኔ ሚላ ኣይፌ ጉምኣና ኦላ ቦኪዴስ። ናጌ ኬሌካ ኬዲዴስ። ሃሳፌ ጎሻንቻታስ ኪራ ኢሚዲ ሃራ ዴሬ ቢዴስ።

<sup>2</sup> ሚላይ ኣይፊዛ ዎዴ ዎይኔ ሚላ ኣይፌ ኤካዳ ያ ጊዲ ኣሸካራታፔ ኢሳዴ ጎሻንቻታኮ ዩዲዴስ።

<sup>3</sup> ጎሻንቻቲ ኣሸካራዛ ኦይኪ ሾጪዲ ጮ ሚላ ኩሽ ዩዲዴ።

<sup>4</sup> ናምኣንቶካ ሃራ ኣሸካራ ዩዲዴስ። ጎሻንቻቲ ሃኢካ ኣሸካራ ኦይኪዲ ኢዛስ ሁኤታራ ቆኢዲኔ ካዉሺዲ ዛሪ ዩዲዴ።

<sup>5</sup> ሃኢካ ዛሪዲ ሃራ ኣሸካራ ዩዲዴስ። ሄ ዩደይሳካ ዎዲዴ፤ ሃራ ዳርታ ጊደፌ ኢሲ ኢሲ አሳታ ቆዲዴ፤ ባጋይታ ዎዲዴ።

<sup>6</sup> «ሃኢካ ከቲቶንታ ኣቲዳ ሃራይ ዴስ፤ ኢዚካ ኣዎይ ደሲዛ ባ ናዛ። ታ ናዛ ኢስቲ ቦሳና ጊ ቆፒዲ ዉርሱላን ባ ናዛ ዩዲዴስ።

<sup>7</sup> ጎሻንቻቲ ቃሴ ባ ጊዶን፥ ሳይሲ ዋና ኢዛ ላታና ናዛ፤ ሃ ዩቲ ኦ ኢዛ ዎዲኮ ቢታይ ኦስ ጊዳና ጊዴ።

<sup>8</sup> ሃሳ ጊሻስ ሄን ኦይኪ ዎዲዲ ዎይኔ ሚላይ ዲዛሶፔ ሃራሶ ኬሲ ዩጊዴ።

<sup>9</sup> «ሂስቲን ዎይኔ ሚላ ጎዳይ ኣይ ኦላና ኢንቲስ ሚሳቲዜ? ኢዚ ያና፤ ጎሻንቻታካ ዎዲና፤ ዎይኔ ሚላ ሃራታስ ኢማና።

<sup>10-11</sup> ጌሻ ማጸፋን፥

ሶቶ ኬሌ ኬዲዛይቲ

ሃኔና ጊዲ

ዎራ ዩጊዴ ሹቻይ

ኬላ ጉላስ ቦላ ሁኤ ጊዲዴስ፤

ሃሳካ ጎዳይ ኦሊዴስ።

ሃሲካ ኦ ኣይፌስ ማላሊሲዛዝ

ጌቲቲዲ ጸፌቲዲይሳ

ናባቢቤኬቲ?» » ጊዴስ። \*

<sup>12</sup> ኢዚ ኢስታስ ሌሚሶዛ ዮቲዳይ ኢስታ ጊሻስ ጊዲዳይሳ ኣይሁዳ ሃላቃቲ ኤሪዳ ጊሻስ ኢዛ ኦይካናስ ኮዩዳ፤ ጊዶ ኣቲን ኣሳስ ባቢዳ ጊሻስ ኣጊ ቢዴ።

\* **12:10-11** ዮቻ ሹቻይ፥ ቱሲ ኬሌ ናጊዛይሳ ማላ ሹቻ ኬሊ ኩንዶንታ ማላ ናጊዛይሳ። **12:10-11** ማዛ 118:22-23

ጌራ ገሻስ ሸቂዳ ኦይሾ

(ማቶ 22:15-22፤ ሉቃ 20:20-26)

13 ዩሱፊ የኦገስቶስ ቃጽና ማላ ፋርሳዊታፕኔ ሄርዶስ ባጋታፕ ጉላ አሳታ ደሪዲ ኢዛኮ ዩዲዳ።

14 ኢስቲካ ኢዛኮ ዩዲ፣ «አስታማሬ! ኔኒ ሞሮይ ባይንዳ አስ ገዲዳይሳ ኑ ኤሮስ፤ ኔ ኦናስካ ባባዳ ዋርዶ ማዳካ፤ ጸሳ ኦኔ ጸላላ ቱሙ ታማርሳሳ። ኦሮሜ ካዋ ቁሳሬስ ጌራ ቃንጸናስ ቤሲዜዬ? ቤሲኔ? ኑ ቃንጸኖዬ? ቃንጸፊኖ?»

15 ዩሱሲ ኢስታ ኦይሻይ ቆጶፕ ቆሞ ገዲዳይሳ ኤሪዲ፣ «አዛስ ታና ቃጽና ኮዬቲ? አኔ ኢሲ ዲናሬ ሃሚቲ ታ ቤያይስ» ገዴስ።

16 ኢስቲካ ሚሻ ኤሂን፣ «ሃይሲ ኢዛ ቦላ ዲዛ ሚሰሌዚ ኦና ሚሰሌ? ኢዛ ቦላ ጸፊቲዳይሲ ኦና ጊዜ?» ገዴስ። ኢስቲካ፣ «ቁሳሬይሳ» ገዳ።

17 ዩሱሲካ፣ «ቁሳሬይሳ ቁሳሬስ፣ ጸሳይሳ ጸሳስ አሚቲ» ገዴስ። ኢስቲካ ኢዛ ዛሮን ማላሌቲዳ።

ሃይቆፕ ዴንላ ገሻስ ሸቂዳ ኦይሾ

(ማቶ 22:23-33፤ ሉቃ 20:27-40)

18 ሃሳፌ ጉዬ ሃይቂዳይታስ ሃይቆፕ ዴንሊ ባ ጊዛ ሳዱቃዊቲ ኢዛኮ ዩዲ ኢዛ ሂዝጊ ኦይቺዳ።

19 «አስታማሬ! ኢሲ አሲ ማቾ ኤኪዲ ና ዩሎንታ ሃይቂኮ ሃይቂዳይሳ አሻይ ኢዛ ማቼዮ ኤኪዲ ኢዛስ ላታ ና ዩላና ማላ ካሴ ሙሴይ ኑስ ጸፊዴስ።

20 ጊዶ አቲን ላፑን አሻንቲ ዴቲስ፤ ኢስታፌ ባይራይ ማቾ ኤኪዲ ና ዩሎንታ ሃይቂዴስ።

21 ካሎዚ ሄ ማጫሳዮ ኤኪዲ ሃኢካ ና ዩሎንታ ሃይቂዴስ፤ ሄቫንሶይካ ዩሎንታ ሃይቂዴስ።

22 ላፑናቲካ ሄ ማጫሳዮ ኤኪዲ ላታ ዩሊቤቴና፤ ወርሴላን ማጫሳያካ ሃይቃዲስ።

23 ሂስቲን ላፑናቲካ ኢዛ ኤኪዳሺን ሃይቆፕ ዴንዶይ ዲዛ ገዲኮ ሃ ማጫሳያ ኢስታፌ ኦና ማቾ ገዳኔ?» ገዳ።

24 ዩሱሲካ ኢስታስ፣ «አንቲ ባሌቲዛይ ጌሻ ማጸፋታኔ ጸሳ ዋልቃ ኤሮንታ ገሻሳ።

25 ሃይቂዳይቲ ዴንዲዛ ዋዴ ሳሎ ኪታንቻታ ማላ ገዳና አቲን ኤኬቴቴናኔ ጌሌቴና።

26 ሃይቂዳይታ ዴንላ ገሻሰ ገዲኮ ሙሴ ማጸፋን ሄሲካ ቄሪ ዋራ ገደን ኤጲዛ ታማ ገደፌ ጸሲ፥ ታኒ ኣብራሃሜ ጸሳ፤ ዩሳቃ ጸሳ፤ ያቆቤ ጸሳ፤ ገዛይሳ ናባቢቤኬቲ?

27 ጸሲ ፓጸታ ጸሳ ኣቲን ሃይቂላታ ጸሰ ገዴና፤ ሄሳ ገሻሰ ኢንቲ ዳሮ ባሌቲዴታ» ገዴሰ።

28 ኢሰቲ ፓላማን ዲሺን ጸፊታፔ ኢሳዴይ ኢሰታ ፓላማ ሲዩዲኔ ዩሱሲ ኦይሼቲዳይሳሰ ሎኤሊ ዛሪዳይሳ ኣኬኪዲ፥ «ኤሮ! ኣዛዘታ ኡባፌ ኣጂዛይ ኣዋይሱ?» ገዲ ኦይቺዴሰ።

29 ዩሱሲ ኢዛሰ፥ «ኡባፌ ኣጂዛይ ሃይሳ፥ ኢሰራኤሌ ሲያ! ጎዳ ኦ ጸሲ ኢሲ ጎዳ፥

30 ኔካ ጎዳ ኔ ጸሳ ኔ ኩሜላ ዋዚናፔ፥ ኔ ኩሜላ ሼምፖፌ፥ ኔ ኩሜላ ቆፋፔ፥ ኔ ኩሜላ ዋልቃፌ ደሳ።»

31 ናምኣንሰይካ፥ ሳ ላጌ ኔ ሁኤ ማላ ደሳ፥ ሃ ናምኣታፔ ኣጂዛ ኣዛዘይ ባ።»

32 ጸፊዚካ፥ «ኣስታማሬ! ሎኦ ጋዳሳ፥ (ጸሲ ኢሲኖ ገዲዳይሳኔ ኢዛፔ ሃራይ ባይንዳይሳ) ኔ ዮቲዳይሲ ሊኬ።

33 ኢዛ ኔ ኩሜላ ዋዚናፔ ኔ ኩሜላ ቆፋፔ ኔ ኩሜላ ዋልቃፌ ደሶይ ቃሴካ ኔ ላጌ ኔ ሁኤ ማላ ደሶይ ጸጌቲዛ ያርሾፌኔ ሃራ ያርሾ ኡባፌ ኣጂሰ» ገዴሰ።

34 ዩሱሲካ ኣዴዚ ዩሺ ቆፒዲ ዛሪዳይሳ ቤኢዲ፥ «ኔኒ ጸሳ ካዋቲላፌ ሃሆን ዳካ» ገዴሰ። ሄሳፌ ጉዬ ኢዛ ኦይቻናሰ ጸሊዳዴይ ቤቲቤና።

35 ዩሱሲ ጸሳ ኬላ ጋላን ታማርሲሺ፥ «ሙሴ ዋጋ ታማርሲዛይቲ ኣዛሰ፥ ሲርሰቶሳ ዳዊቲ ና፥ ገዘ?

36 ዳዊቲ ጸሎ ኣያናን ሃሳይሺ፥ ሳዳይ ታ ጎዳ፥ ኔ ሞርኬታ ታ ኔ ቶሆ ጋርሰ ኣላና ጋካናሰ ታ ኡሻቻን ኡታ» ገዴሰ።

37 ሂሰቲን ዳዊቲ ባ ደናራ ኢዛ፥ ሳዳ፥ ገኮ ዋኒዲ ሲሚ ኢዛሰ ና ገዳኔ?» ገዴሰ። ዳሮ ዴሬይካ ኢዚ ገዛይሳ ኡፋይሳራ ሲዩዴሰ።

38 ኢዚ ታማርሲሺ፥ «ሙሴ ዋጋ ታማርሲዛይታፔ ናጌቲቲ፥ ጋዴራ ጎሼቲዛ ኣዲሳ ማይኦ ማይኢዲ ዩሺ ዩያና ደሴቲሰ፤ ኣዋንካ ኣጂ ኣጂ ኣሲ ኢሰታሰ ቦንቾ ሳሮታ ኣማና ማላ ኮዬቲሰ።

39 ኣይሁዳታ ዋሳ ኬላን ቶቃሶ፥ ገቢራሶንካ ቦንቾሶ ኮዬቲሰ።

40 ኢስቲ አዚናይ ባይንዳ ማጫሳ ኬል ካሎሴቴስ፤ ቃሴካ ባና ቤሳናስ አዲሳ ዋሳ ዋሴቴስ። ሃይታንቲ ኢታ ፒርዳ ፒርዴታና» ጌዴስ።

አምኤይ ሙጵዋታ

(ሉቃ 21:1-4)

41 ዩሱሲካ አሳይ ሙጵዋታ ዩጊዛሶን ኡቲዲ ዳሮ አሳቲ አሚዛይሳ ጸሳ ኬላ ሚሻ ሺሺዛ ሳጺኔን ዩጊዛይሳ ጸሊዴስ። ዳሮ ዴሬቲ ዳሮ ሚሽ ዩጊዳ።

42 ኢሲ አዚናይ ባይንዳ አምኤ ዲዛራ ኢሲ ሲኪናፌ ዳሮንታ ጸርቁማላ ቢራታፔ ኦሴቲዳ ናምኤ ሚሽ ዩጋዲስ።

43 ዩሱሲ ባና ካሊዛይታ ጸይጊዲ፥ «ታ ኢንቴስ ቱሙ ጋይስ፤ ሳጺኔዛን ዩጊዳ ኡባፌ ሃና ማንቆ አምኤያ አጼል ዩጋዲስ።

44 ሃይቲ ዉሪ ባስ ዲዛ ቲርፓ ሚሻፌ ዩጊዳሺን ሃና ቃሴ ባ ማንቆቴላፌ ባስ ዲዛይሳ ሲንላፌ ኢዞ ኮሺዛይሳራ ዉርሳ አማዲስ» ጌዴስ።

## 13

ዩሱሲ ካሴቲ ዮቲዳ ጸሳ ኬላ ላሌቴል

(ማፍ 24:1-2፤ ሉቃ 21:5-6)

1 ኢዚ ጸሳ ኬላፌ ኬዚሺን ኢዛ ካሊዛይታፔ ኢሶይ፥ «አስታማሬ! ሃይሲ ኬላይኔ ኬላይ ኬጼቲዳ ሹቻይ አይ ማላ ሎኢዛኮ ሃይሳ ቤያይ?» ጌዴስ።

2 ዩሱሲካ ዛራዲ፥ «ሃይታ ጌታ ኬላታ ጸላይ? ሹቻቲ ኢሶይ ኢሳ ቦላ ዲዛ ማላ ዴቴና፤ ዉሪካ ላሊታና» ጌዴስ።

ዋዴ ዉርሴላ ማላታታ

(ማፍ 24:3-14፤ ሉቃ 21:7-19)

3 ዩሱሲ ጸሳ ኬላ ገናራ ዳብራዛይቲ ዙማ ቦላ ኡቲ ዲሺን ጸጽሮሲ፥ ያቆቤይ፥ ዮሃኒሲኔ ኢንዲራሲ ጸላ ኢዛኮ ሺቂዲ፥

4 «ሃይሲ አይዴ ሃናናኮ ኑስ ዮታ። ሃይሲ ዉርሴላን ፖሌታናስ ማላታይ አዜ?» ጌ ኦይቺዳ።

5 ዩሱሲካ ኢስታስ፥ «ኦኒካ ኢንቴና ባሌሶንታ ማላ ናጌቲቴ።

6 ቡሮ ዳሮቲ፥ «ታ ኪርስቶሳ» ጌሼ ታ ሱንላን ያና፤ ዳርታካ ባሌላና።

7 ኢንቴ ኦላኔ ኦላ ዋሪ ሲዩዛ ዋዴ ዳጋዋፍቴ፤ ሄሲ ሃናናይሲ አቴና፤ ዉርሴላ ጌዲኮ ቡሮና።

8 ዳሬይ ዳሬ ቦላ፥ ካዎይ ካዎ ቦላ ዳንዳና፥ ዳሮሶን ቢታ ቃሊኔ ኮሻይ ሃናና፤ ሄይቲ ዉሪ ሚጸሰ ሌሶ ማላ።

9 «ኢንቲ ኢንቲስ ናጌቲቴ። ቡሮ ኢንቲና ዳሬ ዱላታን አሊ ኢማና። ኢሰቲ ኢንቲና አይሁዳታ ዋሳ ኬላን ጋራፋና። ኢንቲ ታ ማርካታ ጊዳና ማላ ታ ጊሻስ ዳሬ ዳናታ ሲንላኒኔ ካዎታ ሲንላን ኤቃና።

10 ኮይሮቲዲ ሚሺራች ቃላይ ዳሬ ኡባስ ሳባኬታና ቤሴስ።

11 ኢንቲ ኦይኬቲዲ ፒርዳስ ሺቂዛ ዎዴ ሂኖ ሄ ሳቴዪን ኢንቲስ ኢማቲዛሮ ሃሳይቲ ኣቲን ቢዲ፥ ሓ ኣይ ጊኖ? ጊዲ ካሴቲ ሂርጎፍቲ፤ ሃሳያናይ ጸሎ ኣያናፔ ኣቲን ኢንቲና ጊዴኬታ።

12 «ኢሻይ ኢሻ፥ ኣዎይ ባ ና ሃይቆስ አሊ ኢማና፤ ናይቲ ባና ዩሊዳይታ ቦላ ማካላናኔ ዎዳና።

13 ታ ጋሶን ኢንቲ ኣሳ ኡባን ኢጼቲዳይታ ጊዳና፤ ዉርሴል ጋካናስ ሚኒ ኤቂዳዴይ ጊዲኮ ኣታና።

ዩሩሳላሜ ቦላ ጋካና ጊታ ሜቶ

(ማቶ 24:15-21፤ ሉቃ 21:20-24)

14 «ኢንቲ ሃራሲዛ ቱናቴል ኢዛስ ቤሶንታሶን ኤቂዳሼ ቤይኮ ናባቢዛዴይ ዎዚናን ዎል፤ ዩሁዳን ዲዛይቲ ፑዴ ዙማ ቦላ ባቃቲቶ።

15 ኬላ ካሬን ዲዛዴይ ሶ ጌሎፖ፤ ባ ሚሽ ኬሳና ጊዲ ኬሌ ጌሎፖ።

16 ጎሻሶን ዲዛዴይ ባ ማይኦ ኤካናስ ጉዬ ሲሞፎ።

17 ሄ ጋላሳታን ሻራ ማጫሳታሲኔ ና ቋንሊዛይታስ ኣዬ ኣና!

18 ሄሲካ ባልጎን ጊዶንታ ማላ ጸስ ዎሲቴ።

19 ጸሲ ኮይሮ ሜጄቴል ኡባ ሜጶሶፌ ሃኢ ጋካናስ ዎይኮ ሃይሳፌ ጉዬ ኢዛ ሚሳቲዛይ ባይንዳ ጊታ ሜቶይ ሃናና።

20 ጎዳይ ሄ ጋላሳታ ቃንሎንታኮ ኦኒካ ኣቴና ሺን ባስ ዶሬቲዳይታ ጊሻስ ኢዚ ሄ ጋላሳታ ቃንሊዳስ።

21 «ሄ ዎዴ ኦኒካ፥ ሄኮ ኪርስቶሲ ሃይሳን ዴስ፤ ጊኮ ዎይኮ፥ ሄኮ ሄን ዴስ፤ ጊኮ ኣማኖፒቴ።

22 ዎርዶ ኪርስቶሳቲኔ ዎርዶ ናቤቲ ቡሮ ዴንዲዲ ማላታታኔ ካሴ ሃኒ ኤሮንታ ፓላ ሚሽ ኦላና፤ ኢስታስ ዳንዳዬቲኮ ሃራይ ኣቶሺን ዶሬቲዳይታካ ባሌላና።

23 ሄሳ ገሻሰ ናጌቲቲ፤ ሄ ዋዴይ ጋኮንታ ዲሺን ሃራ ሃይሳ ዉርሳ ታ ኢንቴስ ዮታዲስ።

ከርስቶሳስ ናምኣንሉ ዩስ

(ማቶ 24:29-31፤ ሉቃ 21:25-28)

24 «ሄ ዋዴ ሄ ሜቶዛፔ ካሊዲ ኣርሼይ ቋማና፤ ኣገናይካ ፖኢሱኩ።

25 ጸለንቴቲ ሳሎፔ ቆቆፌታና፤ ሳሎን ዲዛ ዋልቃማቲ ቃጸና።

26 «ሄ ዋዴ ኣሳ ናይ ጌታ ዋልቃራኔ ቦንቸራ ሳሎ ሻራራ ዩሺን ኣሳይ ኢዛ ቤያና።

27 ኢዚካ ከታንቻታ ዩዲዲ ኦይዱ ባጋፌ ቢታ ጋጸፔ ጋጸ ጋካናስ ዲዛ ባስ ዶሬቲዳይታ ሺሻና።

ባላሴ ሚላይ ለሚሶ

(ማቶ 24:32-35፤ ሉቃ 21:29-33)

28 «ለሚሶዛ ባላሴ ሚላፌ ታማርቲ። ኡንቁሎይ ጨሊሊዛ ዋዴ ሃይሉ ከሲሺን ቦኔይ ማቲዳይሳ ኢንቴ ኤሬታ። \*

29 ሄሳላካ ሃይቲ ታ ጌዳይቲ ፖሌቲሺን ኢንቴ ቤይኮ ዋዴይ ማቲ ዩዲ ፔንጌ ጋከዳይሳ ኤሬቲ።

30 ታ ኢንቴስ ቱሙ ጋይሰ፤ ሃ ዮኦቲ ፖሌታና ጋካናስ ሃይሲ ሃ ዩሌታይ ኣጴና።

31 ሳሎይኔ ሳኣይ ኣቆና ሺን ታ ቃላይ ጌዲኮ ኣጴና።

ጎዳይ ያና ጋላሳዮኔ ሳቴዮ ኦኒካ ኤሬና

(ማቶ 24:36-44)

32 «ቃሴ ሄ ጋላሳይ ገሻሰ ዋይኮ ሄ ሳቴይ ገሻሰ ታ ኣዋፔ ኣቲን ሳሎ ከታንቻታ ጌዲንካ ናዛ ጌዲንካ ኦኒካ ኤሬና።

33 ሄሳ ገሻሰ ዋዴይ ኣይዴኮ ኢንቴ ኤርንታ ገሻሰ ናጌቲቲ፤ ሚኒቴኔ ዋሲቴ።

34 ሄሲካ ባ ከሉ ኣሸካራታስ ኣገዲ ኣሸካራታ ኢሳ ኢሳ ኦሶ ኦይሉዲ ፔንጌ ናጌዛይሲ ቤጌዲ ናጋና ማላ ኣዛዚዲ ቢዳ ኣሳ ሚሳቴስ።

13:25 ኢሳ 34:4፤ ኣጁ 6:13፤ ኢዩ 2:10      13:26 ዳኔ 7:13፤ ኣጁ 1:7

\* 13:28 ሃይሲ ሃ ቆዳይ ቤሲዛይሲ ኢስታ ዳሬን ዲዛ ሚላቲ ኣጨዛይኔ ሃይላቲ ጨሊሊዛይ ቦኔ ጌዲዳይሳ ቤሳናሳ።      13:34 ሉቃ 12:36-38

35 «ሂስቲኮ ኬላ ኣዋይ ኣይዴ ያናኮ ዋይኮ ሌላ ጊዶል ያናኮ ዋይኮ ኮይሮ ኩቶይ ባቂሺን ያናኮ ዋይኮ ዋንታ ቦላ ባዘይ ዘኢሺን ያናኮ ኢንቴ ኤርንታ ጊሻስ ቤጊዲ ናጊቴ።

36 ኢንቴ ቆፖንታ ዲሺን ኢዚ ዩዲ ኢንቴ ጳስኪዲሺን ኢንቴና ዴሞፎ።

37 «ታ ኢንቴስ ዮቲዛይሳ ኣስ ኡባስ ዮታይስ፤ ሚኒዲ ናጊቴ! ጋይስ» ጊዴስ።

## 14

ዬሱሳ ዋዳናስ ኣሳ ማቄቲል

(ማቶ 26:1-5፤ ሉቃ 22:1-2፤ ዮሃ 11:45-53)

1 ፓዚጋኔ ኡኬላ ሙሳ ባኣሌ ጋላሳይ ቦንቹታናስ ናሞኡ ጋላሲ ኣቲሺን ቄሴታ ሃላቃቲኔ ሙሴ ዋጋ ታማርሲዛይቲ ዬሱሳ ባሌል ኦይኪዲ ዋዳና ኦጌ ኮዩዳ።

2 ጊዶ ኣቲን፡ «ኣሳይ ሜቶ ሜቶንታ ማላ ባኣሌ ጋላሳታን ጊዶፖ» ጊዳ።

3 ኢዚ ቢታኒያ ጌቲቲዛሶን ኢሲ ኢንቹራቻ ሃርጋንቻ ጊዲዳ ሲሞናሶን ቁማ ቦላ ዲሺን ዋጋይ ዳሮ ኣልኦ ጊዲዳ ናርዶሴ ጌቲቲዛ ሸቶይ ኩሚ ኡቲዳ ኣልባስጸርሴ ቢልቃጾ ኦይኪዳ ኢሲ ማጫሳያ ቢልቃጾዛ ሚንላዳ ሸቶዛ ዬሱሳ ሁኤ ቦላ ጉሳዲስ።

4 ሄን ዲዛ ኣሳታፔ ኢሲ ኢሲ ኣሳቲ፡ «ሃይሲ ሸቶዚ ኣዛስ ዋጋይ ባይንዳ ጉኪዜ?» ጊዲ ባ ጊዶን ሃንቄቲዳ።

5 «ሸቶዚ ባይዜቲዳኮ ሄቹ ጾቱ ዲናሬፔ ቦላራ ባይዜቲዲ ማንቆታስ ኢሚቴኔሺን!» ጊዲ ማጫሳዮካ ካጲዳ።\*

6 ጊዶ ኣቲን ዬሱሲ ኢስታስ፡ «ኣጊቴ! ሃኖ ማጫሳዮ ኣዛስ ዋዩሴቲ? ኢዛ ታስ ሎኦ ሚሽ ኦላዲስ።

7 ማንቆቲ ኣይ ዋዴካ ኢንቴናራ ዴቲስ። ኢንቴ ኮዩዳ ዋዴ ኣይዴካ ኢስታ ማዳናስ ዳንዳዬታ፤ ታ ጊዲኮ ኡባ ዋዴ ኢንቴናራ ዲኬ።

8 ሃና ባ ኦላናስ ዳንዳይዛሪ ኬና ኦላዲስ። ታስ ሞጎስ ጊዳና ማላ ታ ኣሾ ካሴታ ቲያዲስ።

9 ታ ኢንቴስ ቱሙ ጋይስ፤ ሃይሲ ሚሺራች ቃላይ ኣላሚ ኩሚላን ሳባኬቲዛሶን ኣዋንካ ኢዛ ኦልዲይሲ ኢዛ ሃሳኢሲዛዝ ጊዲዲ ሃሳዬታና» ጊዴስ።

14:1 ኬሳ 12:1-27    14:3 ሉቃ 7:37-38    \* 14:5 ሄቹ ጾቱ ዲናሬ ጉሲ ቤኒ ዋዴ ኣሳስ ላይላ ዳሞዛ።    14:7 ዛሬ 15:11

ዬሱሳ አሉ አማናስ ዩሁዳ ገቤቴል

(ማጥ 26:14-16፤ ሉቃ 22:3-6)

10 ሄሳፌ ጉዬ ታማኔ ናምኣታፔ ኢሶይ ኣስቆርንቶ ዩሁዳይ ዬሱሳ አሉ አማናስ ቄሴታ ሃላቃታኮ ቢደስ።

11 ኢስቲካ ሄሳ ሲዱዲ ኡፋዬቲዳ፤ ኢዛስ ሚሼ አማናስ ኢዛራ ገጊዳ፤ ሄሳ ገሻስ ዬሱሳ አሉ አማናስ ኢንጄ ዎዴ ናጊሼ ጋምኢደስ።

12 ፓዚጋ ዶርሲ ሹኬቲዛ ኡኬል ሙሳ ቦንቺዛ ኮይሮ ጋላስ ዬሱሳ ካሊዛይቲ ዬሱሳኮ ሽቂዲ፡ «ፓዚጋ ካዎ ማናሶ ኣዋን ገጊሳና ማላ ኮያይ?» ገ ኦይቺዳ።

13 ኢዚካ ባና ካሊዛይታፔ ናምኣታ፡ «ካታማ ቢቲ፤ ኢንቲ ቢሺን ሃሉ ኦቶራ ቶኪዳ ኢሳዴይ ኢንቲናራ ጋጋና።

14 ኢዚ ቢዲ ጌሊዛሶ ጋካናስ ኢዛ ካሊቲ። ኬላዴዛስ፡ ላኣስታማሬይ ኔና፡ ታና ካሊዛይታራ ፓዚጋ ካዎ ማናስ ታስ ገዲዛ አማላ ሼምፖሶይ ኣዋይሴ? ገዴስ? ገቲ።

15 ኢዚካ ቦላ ፖቄ ቦላ ዲዛ ገጊ ኡቲዳ ኣሆሶ ኢንቲና ቤሳና፤ ሄን ኢዛን ገግሲቲ» ገ ከቲደስ።

16 ኢዛ ካሊዛይቲካ ኬዚዲ ካታማ ቢዳ። ዉሪካ ዬሱሲ ገዳ ማላ ሃኒ ቤቲደስ፤ ፓዚጋካ ሄን ገግሲዳ።

17 ጋዴይ ቃሚሺን ዬሱሲ ባና ካሊዛ ታማኔ ናምኣታራ ጋኪደስ።

18 ኢስቲ ማዳን ዲሺን፡ «ታ ኢንቲስ ቱሙ ጋይስ፤ ኢንቲ ገደፌ ኢሶይ ኢዚካ ታናራ ኢሲፌ ሚዛይሲ ታና አሉ አማና» ገደስ።

19 ኢስቲካ ሙዞቲዲ፡ «ታኔሻ? ታኔሻ?» ገዲ ኢሶይ ኢሶይ ዬሱሳ ኦይቺዳ።

20 ኢዚካ ኢስታስ፡ «ታማኔ ናምኣታፔ ኢሶይ ታናራ ባ ኩሼ ኬሬን ዬዲዛዴ።

21 ካሴ ጳፌቲዳ ማላ ኣሳ ናይ ኢዛ ገሻስ ሃይቃና ሺን ኣሳ ና አሉ አሚዛዴስ ኣዬ ኣና! ሄሳዴይ ካሴ ዬሌቶንታ ኣቲዳኮ ኢዛስ ሎኦኮሺን!» ገደስ።

ኅዳ ካዎ ኤኮ ዎጋ

(ማጥ 26:26-30፤ ሉቃ 22:14-23፤ 1ቆሮ 11:23-25)

22 ኢስቲ ሚሺን ኡኬላ ኤኪ ኣንጂዲኔ ሚንሉዲ ባና ካሊዛይታስ፡ «ሃይሳ ታ ኣሾ ሄኢቲ» ገ አሚደስ።

23 ኡሻካ ዴንሉ ጋላቲዲ ኢስታስ አሚን ኢስቲ ዉሪካ ኡዬዳ።

24 ቃሴ ዩሱሲ፥ «ሃይሲ ዳርታ ገሻስ ጉካና ታ ኦራላ ጫቆ ሱላ።»

25 ታ ኢንቴስ ቱሙ ጋይስ፤ ኦራላ ዋይኔፔ ገጊዳ ኡሻ ጸሳ ካዋቱላን ታ ኡያና ዋዴ ጋካናስ ናምኣንሶ ሃይሳ ኡዪኬ» ገዴስ።

26 ሄሳፌ ጉዬ ዩላ ኢሲፌ ዩዲዲ ፑዴ ዳብራዛይቲ ዙማ ቦላ ኬዚዳ።

27 ዩሱሲ፥ « ታ ሄሚዛይሳ ሾጫና፤ ሄ ዋዴ ኢዛ ዶርሳቲ ላሌታና ጌቲቲ ጸፊቲዳይሳ ማላ ኢንቲ ወሪካ ታናን ቋዴታና።»

28 ታ ዴንዲዳፔ ጉዬ ገዲኮ ታ ኢንቲፌ ካሴታዳ ጋለላ ባና» ገዴስ።

29 ጴጽሮሲካ፥ «አሳይ ወሪ ቋዴቲኮካ ታኒ ቋዴቲኬ!» ገዴስ።

30 ዩሱሲካ፥ «ታ ኔስ ቱሙ ጋይስ፤ ሃች ኦማርስ ኩቶይ ናምኡቶ ዋሳና ጋካናስ ኔኒ ታና ሄቹቶ ካዳና» ገዴስ።

31 ጴጽሮሲ ቃሴ፥ «ታ ኔናራ ሃይቁዛኮካ ሙሌካ ኔና ካዲኬ» ገዲ ኬሂ ሚንሊ ዮቲዴስ። ሃንኮይቲካ ወሪ ኢዛይሳሉ ገዳ።

ጌቲሴማኔን ዩሱሳ ዋሳ

(ማቶ 26:36-46፤ ሉቃ 22:39-46)

32 ሄሳፌ ጉዬ ጌቲሴማኔ ጌቲቲዛሶ ቢዳ፤ ዩሱሲካ ባና ካሊዛይታ፥ «ታኒ ዋሲሺን ኢንቲ ሃይሳን ጋምኢሺቲ» ገዴስ።

33 ጴጽሮሳ፥ ያቆቤኔ ዮሃኒሳ ባናራ ኤኪ ቢዴስ። ኬሂ ቆፒዴሲኔ ሚቶቲዴስ።

34 ቃሴካ ኢስታስ፥ «ታ ሸምፖያ ዳሮ ሜቶታዱስ ኢንቲ ሃን ዲሺቲ። ቋሰኮንታ ናገቲ» ገዴስ።

35 ኢስታ አቻፌ ጉሐ ሃኪ ቢ ቢታ ቦላ ጉፋኒዲ ሄ ሳቲያ ኢዛፔ አቆና ማላ ዋሲዴስ።

36 «ታ አዋዉ! ኔስ ወሪ ዳንዳዬቲስ፤ ሃይሳ ዋዬ ጶኣ ታፔ ሃሳ። ገዲኮካ ኔ ሸኔፔ ኣቲን ታ ሸኔይ ሃናፖ» ገዴስ።

37 ኢዚ ሄፔ ሲሚ ዪሺን ኢዛ ካሊዛይቲ ቋሰኪዳይታ ቤኢዴስ። ጴጽሮሳካ፥ «ሲሞና ቋሰካዲ? ሃራይ ኣቶሺን ኢሲ ሳቲካ ሚናዳ ናጎይ ኔና ጸኒዴ?»

38 ኢንቲ ፓጩን ጌሎንታ ማላ ቤጊዲ ዋሲቲኔ ሚኒቲ። አያናይ ገጌቲ ኡቲዴስ ሺን ኣሾይ ገዲኮ ዳቡራንቻ» ገዴስ።

39 ቃሴካ ቢዲ ኮይሮይሳሉ ዋሲዴስ።

40 እዚ ናምኣንሱ ሲሚ ዩሺን ኢስታ ኣይፊን ዲስኮይ ዳጺን ዲስኮይይታ ዳሚዳስ ሺን ኢስቲ ኢዛስ ኣይ ዛራናኮን ኤሪቤቴና።

41 ሄሻንሱ ዩዲ፡ «ሃእካ ኢንቴ ኢቺዲ ሹምፔቴ? ሃኢ ገዳና፤ ሳቴያካ ጋካዲስ፤ ሄኮ ኣሳ ናይ ናጋራንቻታ ኩሼን ኣዲ ኢሜታና።

42 ኣኔ ኤቂቴ ቦስ፤ ታና ኣሉ ኢማናዴይ ዩዴስ» ገዴስ።

**ዩሱሳ ኦይኬቴሴኔ ኣዲ ኢሜቴሉ**

(ማቶ 26:47-56፤ ሉቃ 22:47-53፤ ዮሃ 18:3-12)

43 ዩሱሱ ቡሮ ሃሳያን ዲሺን ታማኔ ናምኣታፔ ኢሶይ ዩሁዳይ ዩዴስ። እዛራ እሲፊ ቄሴ ሃላቃታፔኔ ሙሴ ዋጋ ታማርሲዛይታፔ ከቲቴዳ ዳሮ ኣሳይ ገላ ማሻኔ ዱርቃ ኦይኪዲ ዩዴስ።

44 ኢዛ ኣሉ ኢማና ዩሁዳይ ኢስታስ፡ «ኣሳ ገደፊ ታ ዩሪዛዴይ ኢዛ ገዲዳ ገሻስ ኦይኪዲ ሎኤሉ ናገ ኤፍቴ» ገዲ ካሴቴ ማላታ ኢሚ ዋሊዴስ።

45 ጋኪዳ ማላ ዩሁዳይ ዩሱሳኮ ሸቂዲ፡ «ኣስታማሬ!» ገዲ ዩሪዴስ።

46 ኣሳቲካ ዩሱሳ ኦይኪዲ።

47 ኢዛ ኣቻን ኤቂዳ ኢሶይ ማሻ ኮሆፔ ሾዲ ቄሴታ ሃላቃዛ ኣሸካራ ሃይሉ ቃንጺዴስ።

48 ዩሱሱካ ኢስታስ፡ «ፓንጋ ማላ ታና ኦይካና ማሻኔ ዱርቃ ኦይኪዲ ዩቲ?

49 ዋንቲን ዋንቲን ጸሳ ኬላን ታማርሳሼ ታ ኢንቴናራ ዲሺን ኦይኪቤኬታ ሺን ካሴ ጸፊቲዳይሲ ፖሌታና ማላ ሃይሲ ሃኒዴስ» ገዴስ።

50 ሄ ዋዴ ኢዛ ካሊዛይቲ ወሪ ኢዛ ዩጊ ኣጊ ቢዳ።

51 ባ ካሎቴሉ ቄሪ ናጸላን ካሚዳ ኢሲ ናይ ዩሱሳ ካሊሺን ኣሳይ ኢዛ ኦይኪን፤

52 ናዚ ናጸላ ዩጊዲ ካሎ ከቺዴስ።

**ፒርዳ ዱላታኮ ዩሱሳ ሸቆ**

(ማቶ 26:57-68፤ ሉቃ 22:54-55፤63-71፤ ዮሃ 18:13-14፤19-24)

53 ዩሱሳካ ጌዴ ቄሴታ ሃላቃኮ ኤፊዳ፤ ቄሴታ ሃላቃቲ፤ ዴሬ ጨማቴኔ ሙሴ ዋጋ ታማርሲዛይቲ ሄን እሲፊ ወሪ ሸቂዳ።

54 ጴጽሮሲካ ዩሱሳ ሃሆራ ካሊሹ ቄሴታ ሃላቃዛ ጊቤ ጋካናስ ቢዴስ። እዚ ሄን ኡቲዲ ሃራ ኣሳታራ ታማ ሆኢሺን፤

55 ቄሴታ ሃላቃቲኔ ዳሬ ጨማቲ ወሪ ዬሱሳ ዋዳናስ ማርካታና አስ ኮዪዳ ሺን ዳማናስ ዳንዳይቤቴና።

56 ዳርቲ ኢዛ ቦላ ዋርዶራ ማርካቲኮካ ማርካታ ቃላይ ኦይኬቲቤና።

57 ኢሲ ኢሲ ማርካቲ ዳንዲዲ ዋርዶራ፤

58 «ሃይሲ አዳዘ፤ ታ አሳ ኩሺን ኬጾቲዳ ጸሳ ኬላ ላላዳ አሳ ኩሺይ ቦቸንታዝ ሃራ ሄቡ ጋላሳራ ታ ኬጸና፤ ጊሺን ኑ ሲዪደስ» ጊ ማርካቲዳ።

59 ጊዶ አቲን ኢስታ ማርካቲሊ ኢሲ ቦላ ዋዳቤና።

60 ቄሴታ ሃላቃይካ ኢስታ ሲንሳን ኤቂዲ፤ «ሃይቲ ኔ ቦላ ማርካቲዛይሲ አዜ? ኔ አዛስ ዶና ዛሪኪ?» ጊዲ ዬሱሳ ኦይቺደስ።

61 ጊዶ አቲን ዬሱሲ ኢስታስ አይኮካ ዛርንታ ጮኡ ጊደስ፤ ቄሴታ ሃላቃይ ቃሴካ፤ «አንጃቲዳ ጸሳ ናይ ኪርሰቶስ ኔ?» ጊ ኦይቺደስ።

62 ዬሱሲካ ዛሪዲ፤ «ኤ፤ ታናኮ! አሳ ናይ ዋልቃማ ጸሳ ኡቫቻን ኡቲሺኒኔ ሳሎ ቫራራ ዪሺን ኢንቲ ኢዛ ቤያና» ጊደስ።

63 ቄሴታ ሃላቃይ ባ ማይኦ ዳኪዲ፤ «ኑስ ሃራ አዛ ማርካ ኮሺዜ?»

64 ኢዚ ጫሻ ቃላ ጸሳ ቦላ ሃሳይሺን ኢንቲ ሲዪደታ፤ ሃኢች ኢንቲስ አይ ሚሳቲዜ?» ጊደስ። ኢስቲካ፤ «ኢዛስ ሃይቆይ ቤሴስ» ጊዲ ወሪካ ኢሲ ቃላን ፒርዲዳ።

65 ሄ ዋዴ ኢሲ ኢሲ አሳቲ ኢዛ ቦላ ጩች ጩቲዳ፤ ኢዛ አይፌ ጎዚ ኦይኪዲ ኢጨሼ፤ «አኔ ቲንቢቲ ዮታ» ጊዳ። ባጋይቲ ቃሴ ቫጋላን ባቂሼ ኤፊዳ።

ጴጽሮሲ ዬሱሳ ካዲደስ

(ማቶ 26:69-75፤ ሉቃ 22:56-62፤ ዮሃ 18:15-18፤25-27)

66 ጴጽሮሲ ዱጌ ባጋራ ሄን ጊቤ ጊዶን ዲሺን ቄሴታ ሃላቃ ጋራደታፔ ኢሲኒያ ያዲስ።

67 ጴጽሮሲ ታማ ሆኢሺን ቲሺ ሂስታ ጸላዳ፤ «ኔኒ ናዚሬቲ ዬሱሳራ ዳሳ ጊዲኪ?» ጋዲስ።

68 ኢዚ ቃሴ፤ «ኔ ጊዛይሳዴ ታ ኤሪኬ፤ ኔ ጊዛይሲ ታስ ጌሌና» ጊዲ ካዲደስ። ሄሳፌ ጌዴ ፔንጌ ፖቂ ኤቂ ዲሺን ሄራካ ኩቶይ ዋሲደስ።

69 ሄ ጋራዴያ ኢዛ ቤኢዳ ማላ ሄን ኤቂዳ አሳታሰ፡ «ሃይሲ አዴዚ ኢዛራ ዲዛ አሳታፔ ኢሳዴኮ!» ጋዳ ቃሴካ ሃሳያዲሰ።

70 ኢዚ ቃሴካ ካዲዴሰ። ጉላ ዋዴ ጋምኢሺን ሄን ኤቂዳ አሳቲ ጴጽሮሳ፡ «ኔኒ ጋሊላ አሳ፡ ሄሳ ጊሻሰ ቱማፔ ኔ ኢሰታፊ ኢሳዴ» ጊዳ።

71 ጊዶ አቲን ኢዚ ቃሴ፡ «ኢንቴ ጊዛዴ ታ ኤሪኬ!» ጊሼ ጫቆኔ ባና ቃንጌላ ኦይኪዴሰ።

72 ሄራካ ኩቶይ ናምኣንሶ ዋሲዴሰ። ጴጽሮሲካ፡ «ኩቶይ ናምኣ ዋሳናሰ ኔ ታና ሄዛ ካዳና» ጊዳ ዬሱሳ ቃላይ ኢዛሰ ቆፊቲን ሂቂሚ ዬኪዴሰ።

## 15

ዬሱሳ ጲላጾሳኮ ኤፊዳ

(ማቶ 27:1-2፤ 11-14፤ ሉቃ 23:1-5፤ ዮሃ 18:28-38)

1 ማላዶ ዋንታራ ቄሴታ ሃላቃቲ፡ ዴሬ ጨማቲኔ ሙሴ ዋጋ ታማርሲዛይቲ ኩሜላ ሻንጎ አላፊታራ ኢሲፊ ዘሬቲዲ ዬሱሳ ቃቺ ኤኪ ኤፊዲ ጲላጾሳሰ አሊ ኢሚዳ።

2 ጲላጾሲካ ዬሱሳ፡ «ኔ አይሁዳታ ካዋ?» ጊ ኦይቺዴሰ። ዬሱሲካ፡ «ኤ፡ ኔ ጊዳ ማላ» ጊዲ ኢዛሰ ዛሪዴሰ።

3 ቄሴታ ሃላቃቲካ ዳሮ ዮኦ ኢዛ ቦላ ሺሺ ሞቲዳ።

4 ጲላጾሲ ቃሴ፡ «ኔ አዛሰ ኦይሻ ዛሪኪ? ሂኮ ኔና ዳሮ ዮኦን ሞቲቲሰ» ጊዲ ቃሴካ ኦይቺዴሰ።

5 ጊዶ አቲን ዬሱሲ ሃኢካ ኢዛሰ አይኮካ ዛሮ ኢሞንታ ጊሻሰ ጲላጾሲካ ማላሌቲዴሰ።

6 ፓዚጋ ባኣሌ ጋላሰ ጲላጾሲ ዴሬይ ቢርሻና ማላ ኦይቺዳዴ ቢርሺ ዬዲዛ ዋጋይ ካሴ ዴሰ።

7 ኢታ ኦሶን ዴሬ ቦላ ዴንዲዲ ሺሞፖ ዋዲዳ አሳታራ ኢሲፊ ቃሹቲዳ ባርባኔ ጌቲቲዛ ኢሳዴይ ዴሰ።

8 ዴሬይካ ዬዲ ካሴ ሎሴ ጊዲዳይሳ ኢዚ ኦላና ማላ ጲላጾሳ ዋሲዴሰ።

9 ጲላጾሲካ ኢሰታሰ፡ «ታ ኢንቴሰ አይሁዳ ካዋ ቢርሻና ማላ ኮዬቲ?» ጊ ኦይቺዴሰ።

10 ጲላጾሲ ሄሳሶ ኦይቺዳይ ካሴ ቄሴታ ሃላቃቲ ዬሱሳ ቃናቴን አሊ ኢሚዳይሳ ኤሪዛ ጊሻሳ።

11 ቄሴታ ሃላቃቲ ቃሴ፡ «ኢዛ ኤጾ ባርባኔይ ቢርሼቶ!» ጊ ኦይቻና ማላ ዴሬዛ ዴንሌዲዳ።

12 ጲላጶሲ፡ «ሂስቲኮ እንቴ አይሁዳ ካዎ ጊዛ አዳዛ ዋስታና ማላ ኮዬቲ?» ጊደሰ።

13 ኢስቲ ቃሴካ፡ «ካቃ! ካቃ!» ጊ ዋሲዳ።

14 ጲላጶሲካ፡ «አይ ኢታ ኦሲዳ?» ጊ ኢስታ ኦይቺደሰ። ኢስቲ ቃሴ፡ «ካቃ! ካቃ!» ጊዲ ካሴፔ አሊ ዋሲዳ።

15 ጲላጶሲካ ዳሬዛ ኡፋይሳና ጊዲ ባርባኔ ኢስታሰ ቢርሺደሰ። ዩሱሳ ጋራፊዲ ካቃናሰ አሊ አሚደሰ።

ዋታዳራቲ ዩሱሳ ቦላ ቂልጪዳ

(ማቶ 27:27-30፤ ዮሃ 19:2-3)

16 ዋታዳራቲ ዩሱሳ ዳሬ ሃሪዛይሳ ጊቤ ኤኪ ቢዲ አቲዳ ዋታዳራታ ኡባ ሺሺዳ።

17 ዩሱሳ ዞኦ ማይኦ ማይዚዳ፤ አጉንፋ አኪሊሌ ጳጲዲ ኢዛ ሁኤን ዋሊዳ።

18 ሄሳፌካ፡ «አይሁዳ ካዎ ሳርይ ኔሰ ጊደ!» ጊሼ ኢዛ ሳርሊዳ።

19 ኢዛ ሁኤ ጉፊራ ሾጪዳ፤ ኢዛ ቦላካ ጩቲዳ፤ ጉልባቲዲ ኢዛሰ ጎይኒዳ።

20 ኢዛ ቦላ ቂፏ ካኢዳፔ ጉዬ ካሴ ማይዚዳ ዞኦ ማይኦዛ ቃሪ ኤኪዲ ካሴ ኢዛ ማይኦዛ ዛሪ ማይዚዲ ካቃናሰ ኤኪ ቢዳ።

ዩሱሳ ካቂቴሰ

(ማቶ 27:31-44፤ ሉቃ 23:27-43፤ ዮሃ 19:17-27)

21 አላኪሳንድሮሳኔ ኤሩሮሳ አዋ ሲሞና ጌቲቲዛ ኢሲ ቃሬና ዳሬ አሲ ዳሬፔ ካታማ ዩዛይሳ ዩሱሳ ማስቃሌ ዋልቃራ ኦይኪ ቶሲዳ።

22 ሄሳፌ ጉዬ ዩሱሳ ጎልጎታ ጌቲቲዛሶ ኤፊዳ፤ ኢዛሰ ቢርሼፋይ፡ «አሳ ሁኤ ጉኔ» ጉሳ።

23 ካርቤ ጌቲቲዛ ጫሞራ ዋላኬቲዳ ዋይኔ ጫጃ ኡያና ማላ ኢዛሰ አሚን ኢዚ ኤኮንታ ኢጲደሰ።

24 ሄሳፌ ጉዬ ኢዛ ካቂዳ፤ ኢዛ ማይኦ ኢሳዴ ኢሳዴ አዋይሲ ጋካናኮ ጊዲ ሳማ ዩጊዲ ጊሼቲዳ።

25 ኢስቲ ኢዛ ካቂሺን ዋንታፌ ሄቹ ሳቲ ጊዲደሰ።

26 ኢስቲ ማስቃሌ ቦላ ጳፊ ሺሺዳ ሞቶ ቃላይ፡ «አይሁዳ ካዎ» ጊዛ ቃላ።

27 ኢዛራ ኢሲፌ ናሞኡ ፓንጋታ ኢሳ ኢዛፔ ኡሻቻራ ኢሳ ሃዲርሳራ ካቂዳ።

28 ሄሳንካ ካሴ ማጻፋይ፥ «ኢታታራ ኢሲፌ ታይቤቲዳስ» ጊዳ ቲንቢቲ ቃላይ ፖሌቲዳስ። \*

29 ኦጌራ አፂ ቢዛይቲካ ባ ሁኤ ቃሊሼ፥ «ኦይ! ኦይ! ጸሓክ ላላዳ ሄዡ ጋላሳን ከጸናይ ኔኔ?» ጊዳ ኢታ ጫሽ ጫዪሼ፥

30 «አኔ ሃኢ ማስቃሌ ቦላፌ ዋዳዳ ኔና አሻ» ጊዳ።

31 ሄሳሶካ ቄሴታ ሃላቃቲኔ ሙሴ ዋጋ ታማርሲዛይቲ ባ ጊዳን ኢሶይ ኢሳስ፥ «ሃራታ አሺዳስ ሺን ባና አሻና ዳንዳይቤና» ጊዳ ኢዛ ቂዲዳ።

32 «ኮ ኢዛ ቤኢዳ አማናና ማላ አኔ ሃይሲ ከርሰቶሲ ኢሰራኤሌታ ካዋይ ሃኢ ማስቃሌፔ ዋዳ» ጊዳ። ኢዛራ ካቂቲዳይቲካ ኢዛ ቦላ ጫሽ ኮሪዳ።

ዬሱሳ ሃይቆ

(ማቶ 27:45-56፤ ሉቃ 23:44-49፤ ዮሃ 19:28-30)

33 ኡሱፑን ሳቴፔ ዶሚዳ ኡዱፋን ሳቴ ጋካናስ ቢታይ ወሪ ቋሚዳስ።

34 ኡዱፋን ሳቴ ቦላ ዬሱሲ፥ «ኤሎሄ! ኤሎሄ! ላማ ሳባቂታኔ» ጊዳ ቃላ ቆቁ ሂስቲዳ ዋሲዳስ። ሄሳስ ቢርሼላይ፥ «ታ ጸሶ! ታ ጸሶ! ኔ ታና አዛስ አጋዲ?» ጉሳ።

35 ሄን ኤቂዳ አሳፔ ኢሲ ኢሲ አሳቲ ሄሳ ሲዬዳ፥ «ኤላሳ ጸይጌስኮ!» ጊዳ።

36 ሄሳፌ ኢሲ አሲ ኤሌሊ ቢዳ ጫሊዳ ዋይኔ ጫጄ † ኢስፖንጄ ማላ ሚሻን ጌልሊ ኬሲዳ ሚላ ጸራን ኦይሊዳ ኡያና ማላ ዬሱሳስ ሺሺዳስ። ሄሳፌ ቃሴ፥ «አኔ አጋጊቲ፤ ኤላሲ ዬዳ ኢዛ ካቆፔ ዋሊሺን ኮ ቤያና» ጊዳስ።

37 ሄሳፌ ዬሱሲ ቃላ ቆቁ ሂስቲ ዋሲዳ ሼምፖ ኬዚዳስ።

38 ጸሓ ከሐ ማጋላሻይ ሁኤራ ዱጌ ናምኡ ኬዚ ዳኬቲዳስ።

39 ዬሱሳ ገናራ ኤቂዳ ኢሲ ማቶ ሃላቃይ ዬሱሲ ሄሳሶ ጊታ ቃላራ ዋሲዳ ሼምፖ ኬዚሺን ቤኢዳ፥ «ሃይሳዳይ ቱሙ ጸሓ ናኮሺን» ጊዳስ።

\* 15:28 ኢሲ ኢሲ ጌሻ ማጻፋቲ ታይቦ 28 ቦላ ዳዛ ቆፋ ጉጃቲስ፤ ቃላዚካ ሉቃሳን 22:37 ቦላ ዳዛይሳ ሚሳቲስ። 15:28 ኢሳ 53:12 15:29 ማዛ 22:7፤ 109:25፤ ማር 14:58፤ ዮሃ 2:19 15:34 ማዛ 22:1 † 15:36 ጫሊዳ ዋይኔ ጫጄ ካቂቲዳ አሲ ባ ዋዬ ባላና ማላ ኡሼቲስ። 15:38 ኬሳ 26:31-33

40 ሄ ዋዴ ማጫሳቲ ሃኒዛይሳ ሃሆን ዲዲ ጸሊዳ። ኢስታ ጊደፌ ማግዳሌፔ ዪዳ ማራማኔ ካሎቲዛ ያቆቤ ዮሳ ኣዮ ማራሚራ ቃሴካ ሳሎሚራ ኢሲፌ ዴቴስ።

41 ሄይቲ ማጫሳቲ ጋሊላን ዬሱሳ ካሊሼኔ ኢዛስ ኦሊሼ ጋምኢዳይታ። ኢስታራካ ኢሲፌ ሃራ ዳሮ ማጫሳቲ ዬሩሳላሜ ቢዳ።

42 ጋዴይ ቃሚ ቃሚ ቢሺን ሳምባታስ ገጌቲዛ ጋላሲ ጋኪዴስ።

43 ዴሬ ጨማታ ጊደን ቦንቹቲዳ ኢሲ ኣርማቲያሴ ዴሬ ኣስ ዮሴፌ ጌቲቲዛይሲ ጸሳ ካዎቴል ናጊሼ ዲዛዴይ ባቦንታ ጰላጸሳኮ ቢዲ ዬሱሳ ኣሃ ዋሲዴስ።

44 ጰላጸሲካ ኢዚ ሂኒ ዋዴ ኤሌራ ሃይቂዳይሳ ሲዪዲ ማላሌቲዴስ። ማቶ ሃላቃ ጸይገሲዲ፥ «ኢዚ ሃይቂ ጋምኢዴ?» ጊዲ ኦይቹዴስ።

45 ኢዚ ሃይቂዳይሳ ማቶ ሃላቃይ ጌሺ ኤሪዳፔ ጉዬ ዬሱሳ ኣሃ ዮሴፌስ ኢሚዴስ።

46 ዮሴፌይካ ሞጎ ማይኦ ሻሚዲ ኣሃ ማስቃሌፔ ዋሊዲ ሞጎ ማይኦን ጸዲዲ ሹቻፌ ዋጩቲዳ ዲፎን ሞጊዴስ። ዲፋ ዶና ሹቻራ ጎርዲዴስ።

47 ማግዳሌፔ ዪዳ ማራሚራኔ ዮሴፌ ኣዮ ማራሚራ ዬሱሳ ኣሃ ኣዋን ሞጊዳኮ ቤኢዳ።

## 16

ሃይቆፔ ዬሱሳ ዴንሰ

(ማቶ 28:1-8፤ ሉቃ 24:1-12፤ ዮሃ 20:1-10)

1 ሳምባታይ ኣጲዳፔ ጉዬ ማግዳሌ ማራማ፥ ያቆቤ ኣዮ ማራሚራኔ ሳሎሚራ ኢሲፌ ቢዲ ዬሱሳ ኣሃ ቲያናስ ሺቶ ሻሚዲ።

2 ሳሚንታፌ ኮይሮ ጋላስ ማላዶ ዋንታራ ቡሮ ኣርሼይ ኬዚዳ ማላ ዬሱሳ ዲፎኮ ቡሮ ቢሺን፥

3 «ዲፎዛ ዶናፔ ሹቻ ኦስ ኦኒ ጌንዴሪሳኔ?» ጊዲ ባ ጊደን ሃሳዬቲዳ።

4 ኢስቲ ቶቁ ጊ ጸሊሺን ዳሮ ጊታ ሹቻይ ዲፎዛ ዶናፔ ጌንዴሪዳይሳ ቤኢዳ።

5 ዲፎዛ ጊዶ ጌሊዳ ማላ ኢሲ ቦላ ማይኦ ማይኢዳ ፓንሊ ኡሻቻ ባጋራ ኡቲዳይሳ ቤኢዲ ዳጋሚዳ።

6 እዚ ቃሴ ኢስታስ፥ «ዳጋሞፍቲ! እንቲ ካቂቲዳ ናዚሬቲ ዩሱስ ኮዩታ፤ እዚ ዴንዲዴስ፤ ሃን ዴና፤ ኢስቲ እዛ ዋሊዳሶ ሃይሳ ቤኢቲ።

7 ጊዶ ኣቲን እንቲ ቢዲ እዛ ካሊዛይታሲኔ ጴጽሮሳስ ካሴ እንቲስ ዮቲዳ ማላ እንቲፊ ካሴቲዲ እዚ ጋሊላ ባና። እንቲ እዛ ሄን ዴማና ጊዲ ኢስታስ ዮቲቲ» ጊዴስ።

8 ማጫሳቲካ ማላሌቲሼኔ ኮኮሪሼ ዱፋፔ ኬዚ ባቃቲዳ። ባቢዳ ጊሻስ ኦናሰካ ኣይኮካ ቃቲቤቲና። \*

9 ሳሚንታፊ ኮይሮ ጋላስ ዋጋ ዋንታ ማላዶራ እዚ ሃይቆፔ ዴንዲዳፔ ጉዩ ዩሱሲ እዚፔ ላፑን ዳይዳንፊ ኬሲዳ ማግዳሌ ማሪሚስ ኮይሮ ቤቲዴስ። †

10 እዛካ ባዳ ካሴ እዛራ ዲዛይቲ ካዮቲሼኔ ዩኪሼ ዲሺን ዴማዳ ዮታዲስ።

11 ኢስቲ ዩሱሲ ፓጸ ዲዛይሳኔ እዛ ታ ዩሱሳ ቤያዲስ ጊዳይሳ ሲዪዲ ኣማኒቤቲና።

ዩሱሲ ባና ካሊዛ ናሞኣታስ ቤቲዴስ  
(ሉቃ 24:13-35)

12 ሄሳፊ ጉዩ እዛ ካሊዛይታፔ ናሞኣቲ ጌዴ ዴሬ ጋርስ ቢሺን ዩሱሲ ኢስታስ ሃራ ኣስ ሚሳቲ ቤቲዴስ።

13 ኢስቲካ ሲሚዲ ሄሳ እዛ ካሊዛይታፔ ኣቲዳይታስ ዮቲዳ፤ ጊዶ ኣቲን እዛ ካሊዛይቲ ሲዪዲ ኣማኒቤቲና።

ዩሱሲ ባና ካሊዛ ታማኔ ኢሲኔታስ ቤቲዴስ

(ማቶ 28:16-20፤ ሉቃ 24:36-49፤ ዮሃ 20:19-23፤ ሃዋ 1:6-8)

14 ሄሳፊ ጉዩ ታማኔ ኢሲኔቲ ማዳ ቦላ ዲሺን ዩሱሲ ኢስታስ ቆንጨዴስ። እዚ ሃይቆፔ ዴንዲን እዛ ቤኢዳ ኣሳቲ ኢስታስ ዮቲን ሲዪዲ ኣማኖንታ ኣጊዳ ጊሻስ ኢስታስ ኣማኖይ ባይንዳይሳኔ ኢስታ ዋዚና ሙሜቱላ ጊሻስ ኢስታ ቦሪዴስ።

16:7 ማቶ 26:32፤ ማር 14:28 \* 16:8 እሲ እሲ ቤኒ ጌሻ ማጻፋታን ታይቦ ኦስፑናፔ ጉዩ ዲዛ ቆፋይ ሃይሳፊ ካሊዲ ጸፊቲዴስ። ማጫሳቲ ጴጽሮሳኮኔ ባ ላጌታኮ ቢዲ ከታንቻዚ ኢስታስ ዮቲዳይሳ ኡባ ኢስታስ ዮቲዳ። ሄሳፊ ጉዩ ዩሱሲ ኣሺዛ ላሚጽንታ ጌሻ ሚሺራች ቃላ ኣርሺይ ሞኪዛሶፔ ወሊዛሶ ጋካናስ ባና ካሊዛ ታማሬታ ባጋራ ከቲዴስ። † 16:9 እሲ እሲ ቢርሼሳታኒኔ እሲ እሲ ሃራታፔ ዱቄቲዳ ጌሻ ማጻፋታን ታይቦ 9-20 ጋካናስ ዲዛ ቆፋይ ጸፊቲቤና።

<sup>15</sup> ኢስታስካ፥ «አላሜ ኡባሶ ቢቴ፥ ሚሺራች ቃላ ሜዴቴል ኡባሰ ሳባኪቴ።

<sup>16</sup> አማኒዳይኔ ጸማቄተዳይ አታና። አማኖንታይ ጊዲኮ ፒርዴታና።

<sup>17</sup> ታና አማኒዛይታ ሃይቲ ማላታቲ ካላና። ኢስቲ ታ ሱንፋን ዳይዳንፋታ ኬሳና፤ አራፋ ቃላንካ ሃሳያና።

<sup>18</sup> ኢስቲ ሾሻታ ባ ኩሼራ ኦይካና፤ ዋዲዛ ማርዜ ኡዪኮካ ኢስታ ቆሄና። ባ ኩሼ ሃርጋንቻታ ቦላ ዋሊ ዋሲኮ ሃርጋንቻቲ ፓጸና» ጊዴሰ።

ፑዴ ሳሎ ዩሱሳ ቡሰ

(ሉቃ 24:50-53፤ ሃዋ 1:9-11)

<sup>19</sup> ጎዳ ዩሱሲ ሄሳ ዮቲዳፔ ጉዬ ፑዴ ሳሎ ዴንዲ ቢዲ ጸሳ ኡሻቻን ኡቲዴሰ።

<sup>20</sup> ኢዛ ካሊዛይቲ ሄሳፌ ኬዚዲ ኡባሶን አዲ አዲ ሳባኪዳ። ጎዳይካ ኢስታራ ኦሊዴሰ። ኢስታ ቲሚርቴዛ ኤኪዲ ኦሊዛይታሰ ባ ዮቲዳ ቃላካ ማላታ ኦሊ ኦሊ ሚንሊዴሰ።

## ጌሻ ማጸፋ

### **Gamo: ጌሻ ማጸፋ Bible of Ethiopia, Ethiopic script**

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

---

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b